

POPERA GA JUDÉUGÜ

GA JAXÕGÜXÛÇAX ÜMATÜXÛ

Tupana rü Nanewa tamaã nidexa

1 ¹Nuxcüma ga Tupana rü muẽxpüxcüna rü nagüxüraũxüãcüma norü orearü uruũgüwa tórü oxigümaã nidexa, rü namaã nüxü nixu ga tacü nüxü na nanaxwaxexü. ²Notürü i nhamaũcüü ja Tupana rü Nanewatama nixi i tamaã jadexaxü rü tüxü nüxü nacuxãxẽxü na nhuxãcü tüxü nangüxẽẽchaũxü. Rü gumaxü nixi ga namuxü na naxüãxüçax ga nhama ga naãne rü dauxüguxü ga naãne rü üaxcü rü tawemacü rü woramacurigü rü êtagü. Rü nhuxmachiguma Nanena nanana ga guxüma ga jema na noxrü jixüçax. ³Rü Nanewa nixi i nüxü idauxü na nhuxãcü namexẽchixü i nüma ja Tupana. Rü nüma ja Nane rü Nanatü ja Tupanarüütama nixi. Rü nhuxma na guxüãrü ãẽxgacü jixü ja Nane, rü guxümaãma inacux rü norü ore i poraxümaã nanamu i guxüma na nüma nanaxwaxexüãcüma na jixüçax. Rü nüma ja Nane nixi ga taxçax najuxü na nüxü rüxoexüçax ga tórü pecadugü. Rü

jemawena rü Nanatixütawa naxü i dauxüguxü i naãnewa. Rü jéma Nanatüarü tügü necüwawa najarüto erü guxüãrü ãẽxgacü nixi i nhuxmax.

Tupana Nane rü guxüma i orearü ngeruügü i dauxüçüãxëtüwa nangẽxma

⁴Rü nhuxma i nüma ja Nane rü guxüma i Tupanaãrü orearü ngeruügü i dauxüçüãxãrü jexera nixi rü naëtüwa nangẽxma jerü jemaãcü nanaxuegu ga Nanatü. ⁵Rü ngẽmaãcü nixi i nhuxma jerü ga Tupana rü taguma wüxi ga norü orearü ngeruüxü nhanagürü:

“Cuma nixi i Chaune. Rü nhuxma chanangoxẽẽ na aixcuma Chaune cuiixü”,
nhanagürü. Rü taguma wüxi ga norü orearü ngeruüchiga nhanagürü:

“Chama nixi i Nanatü chiixü rü nüma rü Chaune nixi”,
nhanagürü. ⁶Notürü jexguma nhama ga naãnewa namuãgu ga Nane ja guxüëtüwa ngẽxmacü, rü nhanagürü ga Tupana:

“Chanaxwaxe i guxüma i chorü orearü ngeruügü i dauxüçüãx

rü nüxü nicuaxüügü ja
Chaune”,
nhanagürü. ⁷Rü jexguma norü orearü
ngeruügü ga dauxcüãxchiga jadexagu
ga Tupana, rü nhanagürü:

“Chama chanaxwaxexüãcuma
chanamu i ngêma chorü orearü
ngeruügü i chorü ngüxêëruügü
ixîgüxü. Rü ngêxguma
chanaxwaxegu rü nhama
buanecü rü nhama üxiemarüü
chajaxîgüxêë, rü chanaporaexêë
na naxügüãxüçax i chorü
ngüchaü”,

nhanagürü. ⁸Notürü jexguma Nanechiga
jadexagu ga Tupana rü nhanagürü:

“Cuma rü chauxrüü Tupana cuixî.
Rü guxügutáma ãëxgacü cuixî.
Rü aixcuma meã guxümaã
icucuax erü aixcumacü cuixî.

⁹Rü nüxü cungechaü i guxüma i
ngêma nacüma i mexü notürü
nachi cuxai i guxüma i ngêma
nacüma i chixexü. Rü
ngêmacax i chama na Cuntü ja
Tupana chiixü rü guxãëtüwa
cuxü changëxmaxêë rü guxãärü
jexera cuxü chataãëxêë”,

nhanagürü. ¹⁰Rü jexgumarüü ta Nanexü
nhanagürü ga Tupana:

“Cuma rü guxüärü Cori cuixî. Rü
noxriarü ügügumama ga
jexguma natauxgutama ga
nhama ga naãne, rü cuma nixî
ga cunaxüxü. Rü cumatama
nixî ga cunaxüxü ga üaxcü rü
tawemacü rü guxüma ga
ëxtagü. ¹¹Rü guxüma i ngêma
rü tá nagux, notürü i cuma rü
guxügutáma cungëxmaëcha. Rü

guxüma i ngêma rü nhama
naxchirüü tá nangaue. ¹²Rü
nhama wüxi i naxchiru i
ngauxü i ngêma itaxmarexürüü
tá ícunawogü i nhama i naãne
rü guxüma i dauxüwa nüxü
idauxü. Rü to i
ngexwacaxüxümaã tá
cunaxüchicüü, nhama wüxi i
naxchiru i ngauxü i
ngexwacaxüxümaã
ixüchicüüxürüü. Notürü i cuma
rü tá cunaxüxügumaraxüëcha
rü tagutáma cuju”,

nhanagürü ga Tupana. ¹³Rü Tupana rü
nhanagürü nüxü:

“¡Nuã chauxütawa rüto nhuxmatáta
nüxü cuxü charüporamaëxêë i
guxüma i curü uwanügü!”

nhanagürü. Notürü ga Tupana rü
taguma jema nhanagürü nüxü ga
ngëxürüxü ga norü orearü ngeruügü ga
dauxcüãx. ¹⁴Rü guxüma i Tupanaärü
orearü ngeruügü i dauxcüãx rü naãëgü
i Tupanaãxü puracüexü nixîgü. Rü
núma ja Tupana rü núma nanamugü na
nüxü janangüxêëgüxüçax i guxüma i
ngêma duüxügü i Tupana naxwaxexü na
najauxgüãxü i maxü i taguma gúxü.

**Tama name i nüxü taxoe i ngêma
maxü i Tupana tüxna uaxüxü**

2 ¹Rü nhuxma na nüxü icuáxü na
guxüma i Tupanaärü orearü
ngeruügü i dauxcüãxärü jexera jîixü ja
Nane, rü ngêmacax tanaxwaxe i
jexeraãcü meã naga taxînüë i ngêma ore
i Nanechiga nüxü ixînüëxü, erü tama
tanaxwaxe na nüxü rüxoexü na
jaxögüxü. ²Rü jexguma taüta Nane ja

Cristuxũ núma namuxgu ga Tupana, rü norü oreatü ngeruũgü ga dauxũcüãxguwa duũxũgümaã nüxũ nixu ga norü mugü na naga naxĩnüëxũçax. Rü jema mugü rü aixcuma natora jerü guxũma ga jema duũxũgü ga tama naga ãnüëxũ, rü jema mugü nüxũ ixuxũãcuma Tupana nanapocue. ³Rü jexguma jemaãcü napocueãgu ga jema duũxũgü ga tama naga ãnüëxũ, çrũ nhuxücürüwa i jixema i naxchaxwa ibuxmüxũ na tama tüxũ napocuexũçax ega nüxũ ixoegu i ngẽma maxũ i mexëchixũ i nhuxma Cristugagu tüxna naxuaxũxũ? Rü düçax, nümatama ja tórü Cori nixĩ ga nüxĩra naxunagüãxũ ga jema maxũ, rü nhuxmachi jixcaama nixĩ ga jema nüxũ ãnüëxũ ga nüxĩ meã tüxũ nüxũ nacuaxëëxũ na aixcuma jĩixũ i tüxũ nangëxmaxũ i ngẽma maxũ ega nüxũ jaxögügu ja Cristu. ⁴Rü nümatama ga Tupana rü ta taxçax nanangoxëë na aixcuma jĩixũ i Cristugagu tüxũ na nangëxmaxũ i ngẽma maxũ. Jerü nüma ga Tupana rü norü duũxũgüwa nanaxü ga muxũma ga mexũ ga taxũgü rü inanawex ga muxũma ga çuaxruũgü. Rü jexguma nagúxũraũãcuma tüxna namuãgu ga Naãë i Üünexũ jema nüma nanaxwaxexũãcuma, rü jexguma nixĩ ga wenaxãrũ tüxũ nüxũ nadauxëëxũ na aixcuma jĩixũ na Cristugagu tüxũ nangëxmaxũ i ngẽma maxũ.

**Tupana rü nhama ga naãnewa
nanamu ga Ngechuchu ja Cristu na
taxrũü duũxũxũ jĩixũçax**

⁵Rü nhuxma rü guxũma i ngẽma mexũgü i Cristugagu tüxũ ngëxmaxũ i pemaã nüxũ tixuchigaxũ, rü Tupana rü

taguma dauxũcüãx ga norü oreatü ngeruũgüna naxãga na namaã inacuaxgüxũçax. Notürü duũxũgüxũ nixĩ ga namuxũ na namaã inacuaxgüxũçax ga guxũma ga jema mexũgü. ⁶Erü wüxiwa i Tupanaãrũ ore i ümatüxũwa rü nhanagürü:

“Pa Tupanax, çrũ tacü nixĩ i duũxũgü rü ngẽmacax nagu curüxĩnüxũ? ÇRü tacüwa name rü ngẽmacax nüxũ cungechaũxũ? ⁷Rü paxaãchi curü oreatü ngeruũ ga dauxũcüãxgütüüwa cunajexmagüxëë ga duũxũgü, notürü i nhuxma rü aixcuma cunaporaexëë rü cujataxëë. ⁸Rü naxmexwa cunangëxmaxëë i guxũma i nhama i naãnewa ngëxmaxũ”,

nhanagürü i ngẽma orewa. Rü jemaãcü nixĩ ga Tupana ga duũxũgümexëwa najexmagüxëëãxũ i guxũma i nhama i naãnewa ngëxmaxũ. Rü nataxuma i tacü i nhama i naãnewa i tama naxmexwa nangëxmaxëëxũ. Notürü woo na ngẽmaãcü jĩixũ, rü nhuxma rü ta taüta nüxũ tadau na duũxũgümexëwa nangëxmaxũ i guxũma i nhama i naãnewa ngëxmaxũ. ⁹Notürü nüxũ tadau ja Ngechuchu ja aixcuma guxũmaãma icuãcü. Rü jexguma Tupana nhama ga naãnewa namuxgu rü paxaãchi norü oreatü ngeruũ ga dauxũcüãxgüarü nhaxtüwaama nanaxüëë. Notürü i nhuxma ja Tupana rü poraãcü Ngechuchuxũ nataxëë rü ãëxgacü ja tacü najaxĩxëë jerü ngúxũ ninge rü guxũma ga duũxũgüçax naju jerü jemaãcü nanaxwaxë ga Tupana

jerü tüxü nangechaü rü tüxü narüngüxêechaü. ¹⁰Jerü ga Tupana rü nanaxwaxe na guxüma i naxacügü nüxü nangëxmaxüçax i nachica i mexü i naxütawa. Rü jemacax nhama ga naãnewa nanamu ga Ngechuchu ja Cristu na ngüxü jangexüçax rü taxçax najuxüçax na aixcumaxüchi tüxü nangëxmaxüçax i maxü i taguma gúxü. Rü name nixi na jemaãcü naxüãxü ga Tupana jerü nümatama nixi ga naxüãxü ga guxüma rü namëxwa nangëxma na nüma nanaxwaxexüãcüma namaã inacuéxüçax. ¹¹Rü Ngechuchu nixi ja tüxü imexëëgücü na Tupanapexewa ixüünegüxüçax. Rü nhuxma i nüma ja Ngechuchu ja tüxü imexëëgücü rü guxäma i jixema na tüxü jaxüünexëëgüxü rü wüxitama nixi ja Tanatü. Rü ngëmacax nixi i nüma ja Ngechuchu ja Tupana Nane, rü tama taxçax naxänexü na naëneëgümaã tüxü naxuxü. ¹²Erü Tupanaärü ore i ümatüxüwa rü nhanagürü ga Nane:

“Rü chaueneëgüxü tá nüxü chacuaxëë i cuchiga, Pa Chaunatüx. Rü norü ngutaquexegüwa rü tá cuxçax chawijae na ngëmaãcü cuxü chicuaxüüxüçax”,

nhanagürü. ¹³Rü toxnamana i Tupanaärü ore i ümatüxüwa rü nhanagürü ta ga Nane:

“Cuxü çajaxõ, Pa Chaunatüx, erü nüxü chacuax rü tá choxü curüngüxëë”,

nhanagürü. Rü nhanagürü ta:

“Rü daxe chixi, Pa Chaunatüx, namaã i cuxacügü i chaueneëgü i choxna cumugüxü”,

nhanagürü. ¹⁴Rü nüma ga Ngechuchu nüxü nacuax na duüxügü ixigüxü, rü jemacax nhama ga naãnewa naxü na taxrüütama naxãmachixüçax rü naxägüxüçax na jemaãcü taxçax najuxüçax na jema norü jumaã nüxü naporamaëxüçax ga Chataná ga noxri nüxü jexmaxü ga pora na tüxü ijanatauxexëëxüçax. ¹⁵Rü jemaãcü nanaxü ga Ngechuchu na Chatanámxëwa tüxü íngaxüxëëxüçax ja guxäma ja jixema noxri naxçax muüxë ga na tajuexü. ¹⁶Rü jemacax nhama ga naãnewa nangu ga Ngechuchu na taxçax najuxüçax i guxäma i jixema na Abráürüü jaxögüxü. Rü tama dauxüçüax i orearü ngeruügüçax naju, notürü taxçax nixi ga najuxü. ¹⁷Rü nüma ga Ngechuchu rü nanaxwaxe na jixema i naëneëgü ixigüxürüütama nügü na jaxixëëxü na jemaãcü aixcuma mecümacü ja nüxü ingechaütümüügücü ja tórü chogürüü jüxüçax i Tupanapexewa. Rü jemacax nixi ga nügü inaxäxü rü najuxü na jemaãcü Tupana duüxügüaxü nüxü ngechaüxüçax i norü pecadugü. ¹⁸Rü jema nümatama ngüxü na jangexü ga jexguma Chataná nüxna ínügu, rü ngëmacax i nhuxma rü nüxü nacuax na tüxü nangüxëëxü ja jixema Chataná tüxna ínüxë.

Ngechuchu rü Muíséétiwa nangëxma

3 ¹Rü nhuxma Pa Chaueneëgü ja Tupanapexewa Üünegüxe, rü pexü nixi ja Tupana ijadexechixü na norü duüxügü peixigüxüçax. Rü ngëmacax name nixi i aixcuma meã nagu

perüxĩnũe ja Ngechuchu ja Cristu ja Tupana núma namucü. Rü nüma ja Ngechuchu nixĩ i tórü chogürũ i Tupanapexewa tüxũ ixüünexêcũ. Rü jimaãxũ nixĩ i jaxögüxũ. ²Rü Tupana rü marü Ngechuchuxũ naxuneta na naxüãxücaç ga jema puracü ga Tupana nüxna äxũ. Rü nüma ga Ngechuchu rü aixcuma Nanatüga naxĩnũ rü najanguxêe ga jema puracü jexgumarũ rü ga Muísé meãma na naxixũ ga jema puracü ga Tupana nüxna äxũ na nüxna nadauxücaç ga Tupanaãrũ duüxũgü ga Judéugü. ³Rü woo ga noxri rü Muíséxũ nitaégacüüxêe ga Tupana, notürü i nhuxma rü Muíséarü jexera Ngechuchuxũ nixĩ i jataégacüüxêexũ. Rü wüxi ja ĩpata ja ngexwacax ixüxũnerũ nixĩ, erü woo ngêma ĩpatamaã tataãe, notürü ngêma jexeraãcü nüxũ icuaxüxũ nixĩ i ngêma ĩpataarü üruũ. ⁴Rü guxũnema ja ĩ rü nüxũ nangêxma i norü üruũ. Notürü guxũma i taçü i ngêxmaxũ, rü Tupana nixĩ ja naxücü. ⁵Rü Muísé rü wüxi ga Tupanaãrũ duüxũ ga aixcuma mexũ nixĩ jerü meã nüxna nadau ga Tupanaãrũ duüxũgü ga Judéugü, jema Tupana namaã nüxũ ixuxũrũ. Rü nüma ga Muísé nixĩ ga jema duüxũgümaã nüxũ jaxuxũ ga nhuxãcü Tupana tá jixcũra nüxũ na rüngüxêexũ. ⁶Notürü nüma ja Ngechuchu rü Muíséarü jexera nixĩ erü Tupana Nanexũchi nixĩ. Rü nüma nixĩ i nüxna nadauxũ i guxũma i ngêma Tupanaãrũ duüxũgü ixĩgüxũ. Rü jixema rü ta Tupanaãrũ duüxũgü tixĩgü ega aixcuma Ngechuchuxũ jaxögügu rü taguma nüxũ rüxoegu. Rü Tupana nanaxwaxe na guxũguma

Ngechuchumaã itaãgüxũ erü nüxũ tacuax na wüxi i ngunexũ rü tá taxcaç nataeguxũ na wüxiwa namaã ingêxmagüxücaç.

Tupanaãrũ duüxũgü rü tá inarüngüe

⁷⁻⁸Rü ngêmacax i Tupanaãrũ ore i ümatüxüwa rü nhanagürü i Naãe i Üünexũ:

“Rü nhuxma na nüxũ pexĩnũexũ i ngêma Tupana pemaã nüxũ ixuxũ, rü tama name na nüxũ pexoexũ, jexgumarũ ga na naxügüãxũ ga jema duüxũgü ga Tupanaxũ ügüxũ rü tama naga ĩnũexũ ga jexguma Muíséwe naxĩxgu ga jema naãne ga ngextá taxüema íxãpataxüwa”.

⁹Rü jemacax ga Tupana rü nhanagürü:

“Rü jema nixĩ ga chixexũ naxügüxũ ga nuxcũmaxũgüxũ ga perü oxigü jerü choxũ naxügü jerü tama choxũ najaxögüchaũ. Rü jemaãcü nanaxügü woo 40 ga taunecügu nüxũ na nadaugüxũ ga jema mexügu ga üünexũ ga napexewa chaxüxũ. ¹⁰Rü jemacax namaã chanu ga jema duüxũgü, rü nhacharügü nüxũ: ‘Pema rü guxũguma chixexũguxicatama perüxĩnũeêcha, rü taguma penaxüxchaũ i ngêma chanaxwaxexũ na penaxüxũ’, nhacharügü nüxũ. ¹¹Rü jemacax nixĩ ga namaã chanuxũ ga jema duüxũgü, rü aixcumaxũchi namaã nüxũ chixu na täxũtãma jema naãne

ga noxri namaã
ichaxunetaxũwa nangugũxũ na
ngẽxma nangũẽxũcax”,

nhanagũrũ ga Tupana. ¹²Rũ nhuxma Pa Chaueneẽgũx, rũ name nixĩ i pegũna pedaugũ na tama ngũriũachi pechixearũ maxũáxũcax, rũ ngẽmagagu na nũxũ perũxoexũ na Tupana ja maxũcũaxũ na pejaxõgũxũ. ¹³Notũrũ nhuxma pexũ natauxchagu, rũ name nixĩ na wũxichigũ pegũaxũ penangũchaũẽxũ i guxũ i ngunexũgu na taxũema i petanũwa Tupanaxũ taxoxũcax nagagu i ngẽma pecadu i pexũ womũxẽẽchaũxũ. ¹⁴Rũ Cristuaxũ tajaxõgũ rũ jemaãcũ tanajaxu ga tórũ maxũ ga noxrix. Rũ ngẽxguma noxrirũũtama guxũguma meã nũxũ jaxõgũechagu rũ tama nũxũ rũxoegu, rũ tá namaã tũxũ nangẽxma i tachica i dauxũguxũ i naãnewa. ¹⁵Notũrũ nhuxma nixĩ i namexũ na meãma jaxõgũxũ. Rũ ngẽmacax i Tupanaãrũ ore i ùmatũxũwa rũ nhanagũrũ:

“Rũ nhuxma na nũxũ pexĩnũẽxũ i ngẽma Tupana pemaã nũxũ ixuxũ, rũ tama name na nũxũ pexoexũ, jexgumarũũ ga na naxũgũãxũ ga jema duũxũgũ ga tama Tupanaga ãnũẽxũ ga jexguma Muísẽwe naxĩxgu ga jema naãne ga ngextá taxũema íxãpataxũwa”,

nhanagũrũ. ¹⁶¿Rũ texẽgũ tixĩ ga guxema nũxũ ãnũẽxẽ ga jema Tupana tũmamaã nũxũ ixuxũ, rũ nhuxmachi tama Tupanaga ãnũẽxẽ? Rũ pemaã nũxũ chixu rũ jemagũ nixĩ ga jema duũxũgũ ga Muísẽ Ejituanewa ínguxũxẽẽxũ. ¹⁷¿Rũ texẽmaã nixĩ ga nanuxũ ga

Tupana ga 40 ga taunecũgu? Rũ pemaã nũxũ chixu rũ namaã nanu ga jema duũxũgũ ga chixexũ ùgũxũ. Rũ jemacax jema nachica ga ngextá taxũema íxãpataxũgu najue. ¹⁸¿Rũ texẽgũmaã nixĩ ga aixcumaxũchi inaxunetaxũ ga Tupana na tãuxũtãma jema naãnewa nangugũxũ na jexma nangũẽxũcax? Rũ pemaã nũxũ chixu, rũ jemagũ nixĩ ga jema duũxũgũ ga tama naga ãnũẽxũ. ¹⁹Rũ ngẽmawa nũxũ tacuax na taxucũrũwama jema naãne ga noxri Tupana namaã ixunetaxũwa nangugũxũ ga jema duũxũgũ, jerũ tama nũxũ najaxõgũ.

4 ¹Rũ ngẽmacax i nhuxma na nũgũxũtawata tá tũxũ jachocuxẽẽxũ na ngẽxma rũngũẽxũcax, rũ tanaxwaxe i taxuãẽgũ, na tama ngũriũachi wũxie i tatanũwa tama ngẽxma taxũcuxũ. ²Erũ nhuxma i jixema rũ marũ nũxũ taxĩnũẽ i Tupanaãrũ ore i mexũ, jexgumarũũ ga jema nuxcũmaxũgũxũ ga duũxũgũ nũxũ na naxĩnũẽxũ. Notũrũ nũmagũ ga jema duũxũgũ rũ taxuwama nũxũ name ga nũxũ na naxĩnũẽxũ ga jema ore jerũ tama jema naga ãnũẽxũrũũ aixcuma nũxũ najaxõgũ. ³⁻⁴Notũrũ i jixema na jaxõgũxũ, rũ tá aixcuma Tupanaxũtawata tichocu na ngẽxma rũngũẽxũcax. Rũ wũxiwa i Tupanaãrũ ore i ùmatũxũwa rũ ngũxchigaarũ ngunexũchigaxũ nixu, rũ nhanagũrũ:

“Rũ 6 ga ngunexũgu nixĩ ga naguxẽẽãxũ ga norũ puracũ ga Tupana. Rũ jexguma norũ 7 ga ngunexũwa nanguxgu rũ guxũma ga norũ puracũna narũngũ”,

nhanagürü. Rü nuxcüma ga Tupana rü nanaxwaxe na nangüëxü ta ga jema nuxcümaxügüxü ga tórü oxigü ga Muíséwe rüxixü. Notürü ga nümagü rü tama nüxü najaxögüchaü rü tama naga naxinüë. Rü jemacax ga Tupana rü norü ore i ümatüxüwa rü nhanagürü:

“Jema duüxügü rü tama choxü najaxögü rü jemacax namaã chanu rü aixcumaxüchi namaã nüxü chixu na täxütáma jema naãne ga namaã ichaxunetaxüwa nangugüxü na ngëxma nangüëxüçax”,

nhanagürü. ⁵⁻⁶Rü jemaãcü ga jema duüxügü ga nüxira nüxü inüëxü ga Tupanaärü ore i mexü, rü tama nawa nichocu ga jema nachica ga Tupana namaã nüxü ixuxü, jerü tama naga naxinüë. Rü ngëmacax nixi i Tupanaärü ore i ümatüxüwa i nhaxü:

“Ngëma duüxügü i tama chauga inüëxü rü täxütáma ngëma nachica i namaã ichaxunetaxüwa nichocu na ngëxma nangüëxüçax”,

nhaxü. Notürü nhuxma rü ta nangëxma i nachica i tümacax ja Jíxema ngëxma Tupanaxütagu chocuchaüxë na ngëxma tarüngüëxüçax. ⁷⁻⁸Rü ngëma nachica i ngextá nagu nangüëxü i duüxügü rü tama jema naãne ga nuxcümaxügüxü ga tórü oxigüxacügü tümaärü äëxgacü ga Jochuémaã tajauxgüxü nixi. Jerü jexguma chi jema naãne jixigu, rü Tupana rü tau chima wenaxärü nüxü naxuneta ga to ga ngunexü na nagu naxütawa jachocuxüçax na ngëxma nangüëxüçax i duüxügü. Rü jemacax ga Tupana rü wenaxärü nüxü naxuneta i

wüxi i to i ngunexü na naxütawa jachocuxüçax i duüxügü na ngëxma nangüëxüçax. Rü ngëma ngunexü rü nhuxma nixi. Rü jemacax ga Tupana rü mucüma ga tauncü ga Muíséwena rü Dawímaã nüxü nixu ga jema norü ore ga ümatüxü i nhaxü:

“Rü nhuxma na nüxü pexinüëxü i ngëma Tupana pemaã nüxü ixuxü, rü tama name na nüxü pexoexü”,

nhaxü. Rü jematama nixi ga ore ga marúchirex pemaã nüxü chixuxü. ⁹Rü ngëmacax i nhuxma rü ta nangëxma i wüxi i nachica i üünexü i nagu tá aixcuma nangüëxü i ngëma Tupanaärü duüxügü ixigüxü. ¹⁰Rü jíxema Tupanaxütawa ichocuxe na ngëxma tarüngüëxüçax, rü nüxna tarüngüë i guxüma i tümaärü puracügü jexgumarüü ga Tupana rü nüxna na nangüxü ga norü puracügü ga jexguma naãne naxüxguwena. ¹¹Rü ngëmacax tanaxwaxe i meã tajaxögü rü naga taxinüë na ichocuxüçax i ngextá Tupana tüxü írüngüëxëxüwa. Erü tama tanaxwaxe na texé ngürüächi jema nuxcümaxügüxü ga duüxügü ga tama Tupanaga inüëxürüü norü orexü na taxoxü. ¹²Erü Tupanaärü ore rü namaxü rü naporaxüchi. Rü wüxi i tara i guxüçuwawa meã waixmaguxüärü jexera nixi na natéxü. Erü ngëma ore rü tawa nixücu nhuxmata taãëwa nangu, rü nhuxmata nawa nangu i ngëma wüxichigü nagu rüxínüxü. Rü ngëmaãcü meãma nanangoxëëãma i guxüma i ngëma jixicatama nagu rüxínüxü rü tüxü ngüchaüxü. ¹³Rü nataxutáma i tacü i Tupana tüxü i tá naxchaxwa nügü

icúxũ erũ napexewa rü guxũma meã nangox. Rü guxũxũ nadau rü guxũxũ nacuaç ja jima tá tũxna çacũ na namaã nüxũ ixuxũçax i tórũ maxũchiga.

Ngechuchu rü mecũxũchi ja tórũ ngũxẽeruũ nixĩ i Tupanapexewa

¹⁴Ngechuchu ja Tupana Nane rü mecũxũchi ja tórũ ngũxẽeruũ nixĩ i Nanatũpexewa. Rü nhuxma rü dauxũguxũ i naãnewa i Nanatũxũtawa nangẽxma na ngẽma taétũwa nachogũxũçax. Rü ngẽmacaç tanaxwaxe i guxũguma nüxũ tajaxõgũecha rü taguma nüxũ tarũxoe. ¹⁵Rü nüma ja Ngechuchu rü aixcuma nüxũ nacuaç na tũxũ nangũxẽexũ erũ nüxũ nacuaç na nhuxãcũ tũxũ naguxchaxũ i ngẽxguma Chataná tũxna ãngu rü pecadugu tũxũ nanguxẽeçhaũgu, jerũ nüxna rü ta naxĩnũ ga Chataná, ngẽma tũxna na naxĩnũxũrũũ. Notürũ nüma ga Ngechuchu rü taguma chixexũ naxũ. ¹⁶Rü nhuxma na tũxũ nangẽxmaxũ ja tórũ ngũxẽeruũ ja Ngechuchu, rü name nixĩ i tama imuẽeãcũma nüxna tangaicamagũ ja tórũ ãẽxgacũ ja Tupana ja tũxũ ngechaũcũ. Rü tanaxwaxe na ngẽmaãcũ nüxna ingaicamagũxũ na nüxũ ingeçhaũtũmũgũxũçax rü tũxũ nangeçhaũãcũma tũxũ nangũxẽexũçax i ngẽxguma guxchaxũgũ tũxna ngaicamagu.

5 ¹Nuxcũma ga Tupana rü Muĩsẽmaã nüxũ nixu na Aráũ jĩxũçax ga Judẽgũarũ paigũeru ixĩcũ na guma duũxũgũtũwa chogũxũçax ga Tupanapexewa. Rü guxũma ga jema Aráũwena ügũxũ ga paigũeru rü

duũxũgũtanũwa nüxũ naxunetagũ na jema duũxũgũarũ ngũxẽeruũ jĩxũçax ga Tupanapexewa rü Tupanana naxããxũçax ga ãmaregũ rü Tupanacaç nadaiãxũçax ga naxũnagũ na jemaãcũ nüxũ nüxũ nangeçhaũxũçax ga norũ pecadugũ. ²Notürũ ngẽma paigũeru rü guxũma i duũxũgũrũũtama nixĩ na pecadugu nanguxũ. Rü ngẽmacaç nüxũ nacuaç na nhuxãcũ jaxna namaã naxĩnũxũ i duũxũgũ i ngẽxguma naẽchitamare pecadu naxũegu rü tama aixcuma Tupanawe naxĩxgu. ³Rü ngẽma paigũeru rü tama ngẽma duũxũgũarũ pecaduçaxicatama nixĩ i nadaiãxũ i naxũnagũ, notürũ nanaxwaxe i noxrũtama pecaduçax rü ta na nadaiãxũ i naxũnagũ na ngẽmaãcũ Tupana nüxũ nüxũ nangeçhaũxũçax i ngẽma pecadugũ. ⁴Rü taxũema tũgũtama tingucuchixẽẽ na paigũeru tiĩxũçax. Notürũ Tupana nixĩ ja tũxũ unetacũ rü tũxna naxãcũ i ngẽma puracũ na paigũarũ ãẽxgacũ tiĩxũçax, jexgumarũũ ga Tupana rü Aráũxũ na jangucuchixẽẽxũrũũ na paigũeru jĩxũçax. ⁵Rü jexgumarũũ ga Ngechuchu rü tama nügũtama ningucuchixẽẽ na Tupanapexewa tórũ ngũxẽeruũ i paigũeru jĩxũçax. Notürũ Tupana nixĩ ga jangucuchixẽẽcũ. Jerũ Tupanatama nixĩ ga nüxũ nhacũ:

“Cuma nixĩ i Chaune. Rü nhuxma chanangoxẽẽ na Chaune cuiĩxũ”, nhacũ. ⁶Rü toxnamana i Tupanaãrũ ore i ãmatũxũwa rü nhanagũrũ ta:

“Cuma nixĩ i guxũgutáma duũxũgũarũ ngũxẽeruũ i paigũeru cuiĩxũ, guma pai ga Meuquichederũũ”,

nhanagürü. 7Rü jexguma Cristu nhama ga nañewa maxũgu, rü poraãcü najumuxê rü tagaãcü rü naxauxãcü Tupanana naca na nüxũ nangũxêẽxũcax na naga naxĩnũcax. Rü jemaãcü nanaxü ga Cristu, jerü Tupana rü napora na nüxũ nangũxêẽxũcax na tama juxũ namuũxũcax. Rü Tupana rü Cristuxũ naxĩnũ jerü nüma ga Cristu rü aixcuma Tupanaga naxĩnũ. 8Rü nüma ga Cristu rü woo Tupana Nane na jiixũ, rü poraãcü ngũxũ ninge na jemaãcü nüxũ nacuáxũcax na nhuxãcü jaxna namaã naxĩnũxũ. Rü jemaãcü aixcuma Tupanaga naxĩnũ. 9Rü jemaãcü najanguxêẽ ga guxũma ga jema puracü ga Nanatü nüxna ãxũ. Rü jemacax curuchagu naju na guxãma ja texê ja naga ãnũxêãrũ maxêxêãruũ na jiixũcax. 10Rü Nanexũ nixĩ ga naxunetaxũ ga Tupana na guxũgutãma nügüpexewa tórü ngũxêãruũ i paigüeru jiixũcax jexgumarũ ga pai ga Meuquichedê ga norü jumuxêwa nuxcũmaxũcü ga tórü oxĩ ga Abrãũcax Tupanana cacü na guma Abrãũxũ nangũxêẽxũcax ga Tupana.

Wüxi i ãucũmaxũchixũ nixĩ na nüxũ rüxoexũ na jaxõgũxũ

11Rü nhuxma rü toxũ nangẽxma i muxũchixũma i ore i Cristuchiga ixĩxũ i pemaã nüxũ tixuxchaũxũ. Notürü naguxchaxũchi na meãma pemaã tanangoxêẽxũ i ngẽma, erü pema rü tama nüxũ pecuáxchaũ. 12Rü marü nhuxgumama nüxũ na pecuáxũ i Tupanaãrũ orchiga, rü pema rü chi marü namaã pengüexêẽtae. Notürü i pema rü nhuxma rü ta penaxwaxe na

wena pemaã tanangoxêẽxũ i ngẽma Tupanaãrũ ore i tauxchaxũ i nawa inaxügũxũ na Tupanachigaxũ icuáxũ. Rü ngẽmaãcü i pema, rü õxchanagürüũtama peixĩgü. Erü wüxi i õxchana rü naẽgünenixũ ja tauxchaãcü jaxaxüne nixĩ ja nanaxwaxene. Rü ngẽxgumarũ peixĩgü i pema i nhuxmax, erü penaxwaxe na wenaxãrũ pemaã nüxũ tixuxũ ga jema ore ga marü pemaã nüxũ tixuchiréxũ na nhuxãcü Cristuxũ pejaungxũxũ. Erü tama nüxũ pecuaxgüẽga i guxũma i ngẽma Tupanaãrũ ore i jexeraãcü tamaã nüxũ ixuxũ i Cristuchiga na nhuxãcü Tupana nanaxwaxexũ na naga pexĩnũxũ. 13Rü jixema jaxõxê ja tama nüxũ cuaxégaxe na nhuxãcü Tupanacax tamaxũxũ, rü wüxi i õxchana i maixũrũtũ tixĩ. Rü ngẽmaãcü peixĩgü i pemax. 14Notürü jixema jaxõxê ja tümamaã jaxúxe na tanangügũxũ na tacü jiixũ i nguxêẽtae i mexũ rü tacü jiixũ i nguxêẽtae i chixexũ, rü aixcuma nüxũ tacuax na nhuxãcü Tupanacax tamaxũxũ. Rü jixema rü nhama wüxi i duũxũ i jaxũ i namachimaã ãwemũxũrũtũ tixĩ. Notürü i pema rü tama ngẽmaãcü peixĩgü.

6 1Rü ngẽmacax name nixĩ i jexeraãcü tingüetanü na aixcuma meã nüxũ icuáxũcax i Cristuchiga. Rü tanaxwaxe na nüxũ ichopetixũ ga jema ore ga nawa inaxügũxũ na Cristuchigaxũ icuáxũ. Rü tãxũtãma jeũcüürü jema ore ga nawa inaxügũxũchiga tidexagüiecha. Rü taxuũcaxma tũxcüũ wena pemaã nüxũ tixu na nüxũ perüxoexũcax na naga pexĩxũ i ngẽma mugü ga Muísé ãmatixũ i tama tũxũ maxêxêẽxũ. Rü

ngëxgumarüü ta taxuũcaxma tüxcüü wena pemaã nüxü tixu i nachiga na nhuxäcü Tupanaãxü jaxögüxü. ²Rü ngëxgumarüü ta taxuũcaxma tüxcüü wena pexü tangüexëë na nhuxäcü Tupanacax íbaiüxü rü nhuxäcü duüxügüxü ingögüäcúma namaã ijumüxëxü. Rü ngëxgumarüü ta taxuũcaxma tüxcüü wena pexü tangüexëë na nhuxäcü tá wena namaxëxü i duüxügü i juexü rü nhuxäcü naãneärü guxgu rü Tupana tá wüxichigü i duüxügüna çaxü na nhuxäcü namaxëxü i nhama i naãnewa. ³Rü ngëmacax i nhuxma rü ngëxguma Tupana tama tüxna nachuxgu rü tanaxwaxe i jexeraäcü tingüetanü na aixcuma guxüma i Cristuchigaxü icuáxüçax rü nüxü na icuáxüçax na aixcuma ngëma nüma nanaxwaxexüäcúma meã naxçax na imaxëxü. ⁴⁻⁵Notürü ngëxguma chi wüxie Cristuxü jaxgu, rü chi meãma Tupanaxü tacuaxgu, rü chi Naã i Üünexüxü tajaugxu, rü chi nüxü tacuaxgu na nhuxäcü namexü i Tupanaärü ore rü nhuxäcü na namexü i dauxügüxü i naãne, rü name nixí i taxuãë. ⁶Erü ngëxguma chi ngëmaäcü meã tajaxõxgu i noxrix rü nhuxmachi Cristuxü ítataxüchixgu, rü marü taxucürüwama texé wenaxärü Tupanacax tüxü tateguxëë. Erü ngëxguma ngëmaäcü ítanaaxüchixgu ja Tupana Nane, rü nhama wena curuchawa tajapotaxürüü tajaxixëë, erü guxü i duüxügüpexewa äne nüxü tingexëë. ⁷Rü dücax, wüxi i naãne i pucü nagu nguxü rü meãma i nanetü nawa jaexü tümacax ja jíxema nagu

üanexë, rü Tupana rü namaã nataãë i ngëma naãne. ⁸Notürü ngëxguma chi ngëma naãne rü tuxu rü natüanegü i chixexü nawa jaegu, rü Tupana rü chixexü tá namaã nixugü rü tá üxüwa najagu i guxüma i nawa jaexü. Rü ngëxgumarüü tá tixí ja jíxema Cristuxü ítaxe.

**Ítananguxëë na najauxgüxü i maxü
i taguma gúxü rü ngëmacax tama
nüxü tarüxoe na jaxögüxü**

⁹Notürü, Pa Chaueneëgü ja Pexü Tangechaügüxe, rü woo ngëmaäcü pemaã tidexagügu, notürü aixcuma nüxü tacuax na tama ngëma duüxügü i nüxü rüxoexürüü peixügüxü. Erü pema rü pexü nangëxma i maxü i taguma gúxü, rü Tupana rü tá aixcuma poraäcü pexü narüngüxëë na naxçax pemaxëxüçax. ¹⁰Erü nüma ja Tupana rü aixcumacü nixí. Rü nüma rü täxüxtáma nüxü inajarüngüma ga jema mexü ga pexüxü rü nhuxäcü taeneëgü i jaxögüxüxü na pengechaügüxü ga jexguma nüxü perüngüxëëgügu, ngëma nhuxma ípenaxüxürüütama. ¹¹Rü nhuxma rü tanaxwaxe i wüxichigü i pema rü ngëmaäcü noxrirüü mexü i perü ngüchaümaã nüxü perüngüxëëgüiecha i taeneëgü nhuxmatáta wena núma naxü ja Cristu. Rü tanaxwaxe na ngëmaäcü pemaxëxü na düxwa aixcuma Cristuxütawa pengügüxü ngëma ípenanguxëëxürüü. ¹²Rü tama tanaxwaxe na nüxü perüxoetanücüxü na Cristuwe perüxixü. Notürü tanaxwaxe i naxrüü peixügü i ngëma duüxügü i guxüguma meã jaxögüäcúma Cristuwe rüxíamaxü

rü najauxgüxü i guxüma i ngëma mexügu ga Tupana namaã ixunetaxü. ¹³Rü dücax, jexguma tóru oxí ga Abráümaã inaxunetagu ga Tupana rü nügiégagutama inaxuneta, jerü tataxuma ga texé ga norü jexera ixixé na tümaégagu inaxunetaxüçax. ¹⁴Rü nüma ga Tupana rü nhanagürü nüxü ga Abráü:

“Rü aixcumaxüchi tá poraãcü cuxü charüngüxëë. Rü tá cuxü nangëxma i muxüchixütama i cutaagü”,

nhanagürü nüxü. ¹⁵Rü Abráü rü meãma ínananguxëë ga guma nane ga Tupana namaã ixunetacü. Rü jemacax nabu ga guma nane ga Isaqui ga Tupana namaã nüxü ixücü. ¹⁶Rü ngëxguma duüxügu ãacüçax ixunetagu, rü to i norü jexera ixixüégagu inaxunetagu. Rü wüxicana ãacüçax ngëmaãcü inaxunetagu, rü nüxü tacuçax rü aixcuma tá nanaxügu i ngëma naxçax inaxunetagüxü, rü marü taxucürüwama jeüçürü nachiga nidexagüecha. ¹⁷Rü jemacax ga Tupana rü jexguma inaxunetagu namaã ga jema duüxügu ga najauxgüxü tá ga jema ngüxëë ga Tupana nüxna äxchaüxü, rü nügiégagutama inaxuneta, jerü nanaxwaxe na meãma nüxü nacuxgüxü na aixcuma tá janguxëëãxü rü tagutáma naxüchicüüãxü ga jema namaã inaxunetaxü. ¹⁸Rü nüxü tacuçax rü ngëxguma ãacüçax nügiégagu inaxunetagu ja Tupana, rü taxucürüwama tüxü nawomüxëë rü nanaxüchicüü i ngëma. Rü nhuxma i guxãma i jixema na Tupanacax ibuxmüxü na tüxü nangüxëëxüçax rü tüxü namaxëëxüçax, rü nüma ja

Tupana rü nügiégagu tamaã inaxuneta na ngëmaãcü tá tüxü nangüxëëxü. Rü ngëmaãcü tüxü nanangüchaüxëë rü tüxü narüngüxëë na nüxü icuáxüçax na aixcuma tá najauxgüxü i ngëma maxü i taguma gúxü i tamaã inaxunetaxü. ¹⁹Rü nhuxma na ínanguxëëxü na aixcuma tá najauxxü i ngëma maxü i taguma gúxü, rü taxuüçaxma taxoegaãëgü, erü nüxü tacuçax na aixcuma dauxügüxü i naãnewa i Tupana íngëxmaxüwa tá ingugüxü. ²⁰Rü ngëma nangëxma ja Ngechuchu i nhuxma jerü nüxira jexma naxücu na Tupanapexewa taétüwa nachogüxüçax. Rü ngëmaãcü guxüguma tóru ngüxëëruü i paigüeru nixí, guma Meuquichedé ga Tupanapexewa Abráüétüwa chogüçürüü.

Ngechuchu rü guma nuxcümaãcü ga pai ga Meuquichedérüütama nixí

7 ¹Rü guma Meuquichedé rü íãne ga Charéüãrü äëxgacü nixí ga jexguma namaxügu ga Abráü. Rü nüma ga Meuquichedé, rü duüxügüaru pai nixí ga Tupanapexewa. Rü jexguma Abráü rü to ga nachüãneãrü äëxgacügümaã nügi nadaixgu rü nüxü najexeragu, rü Meuquichedé rü namawa Abráüpexegu najangu ga jexguma Abráü napataçax taegugu. Rü nüma ga Meuquichedé rü najumuxé na Tupana Abráüxü rüngüxëëxüçax. ²Rü Abráü rü nüxü najexma ga guxüma ga jemaxügu ga jema äëxgacügu ga namaã nügi naçaxüna napuxüxü. Rü jemawa ínanaxüchüchi ga jema Tupanana üxü, rü Meuquichedéna nanaxã. Rü ngëma naéga i Meuquichedé rü Äëxgacü ja Ixaixcumacü nhaxüchüga nixí. Rü norü

ĩane ga Charéũ rü Taãẽxẽeruũ nhaxũchiga nixĩ. Rü ngẽmacax i naéga i Meuquichedé rü ãẽxgacũ ja Taãẽxẽeruũ nhaxũchiga ta nixĩ. ³Rü Tupanaãrũ ore ga nuxcũma ũmatũxũwa rü tama nũxũ nixu na texé tiixũ ga nanatũ rü naẽ rü norũ oxigũ ga Meuquichedé. Rü ngẽxgumarũũ ta tama nũxũ nixu i norũ buxchiga rü norũ juxchiga. Rü ngẽmacax Tupana Nanerũũ guxũguma duũxũgũarũ ngũxẽeruũ ja pai nixĩ i Tupanapexewa. ⁴Rü nhuxma rü name nixĩ i nagu perũxĩnũẽ na nhuxãcũ aixcuma ãẽxgacũ ja tacũ jĩixũ ga Meuquichedé. Jerũ nuxcũmaxũcũ ga tórũ oxĩ ga Abráũ rü Meuquichedéna nanaxã ga jema Tupanana ũxũ ga natanũwa ga jema jemaxũgũ ga togũ ga ãẽxgacũgũna napuxũxũ. Rü ngẽmawa nũxũ tacuax na Tupanapexewa tórũ oxĩ ga Abráũarũ jexeracũ jĩixũ ga Meuquichedé. ⁵Rü nhuxma i Judéugũ, rü guxũma i norũ ngẽmaxũwa ínanaxũxũchigũ i ngẽma Tupanana ũxũ, rü nhuxmachĩ norũ paigũna nanaxã jerũ jemaãcũ nixĩ ga namuãxũ ga jema mugũ ga Muísẽ ũmatũxũ. Notürũ guxũma i ngẽma paigũ rü Lewítaagũ nixĩgũ. Rü nũma ga Lewĩ rü guxũma i Judéugũrũũ Abráũtaa nixĩ. Rü ngẽmaãcũ i ngẽma Judéugũ rü norũ paigũna nanaxã i ngẽma Tupanana ũxũ, woo natanũxũ na jĩixũ i ngẽma paigũ. ⁶Notürũ ga Meuquichedé rü woo tama Lewítaa nixĩ, notürũ Abráũmexẽwa nanajaxu ga jema Tupanana ũxũ. Rü nũxũ tacuax na Abráũ jĩixũ ga noxri najaxucũ ga Tupanaãrũ uneta. Rü nũma ga Meuquichedé rü Tupanana naca na Abráũxũ nangũxẽẽxũcax ga Tupana.

⁷Rü guxãma meãma nũxũ tacuax rü ngẽxguma texé toguecax Tupanana caxgu na tũxũ nangũxẽẽxũcax, rü Tupanapexewa rü jĩxema nũxna caxe rü ngẽma togũ i naxcax ítaçaxũarũ jexera tixĩ. Rü ngẽmaãcũ nũxũ tacuax na Abráũarũ jexera jĩixũ ga Meuquichedé i Tupanapexewa. ⁸Rü nhuxma i nuã tatanũwa rü ngẽma paigũ i ngĩxũ jauxgũxũ i ngẽma dĩẽru i Tupanana ũcũ, rü duũxũgũmare nixĩgũ rü tá najue. Notürũ ngẽxguma Meuquichedéchiga jadexagu i Tupanaãrũ ore, rü nhama namaxũgurũũ nixĩ i nachiga jadexaxũ. Rü ngẽmawa nũxũ tacuax na Cristu ja guxũguma maxũcũrũũ jĩixũ ga Meuquichedé. ⁹⁻¹⁰Rü Abráũtaa ga Lewĩ, rü guxũma i paigũ i Lewítaagũ ixĩgũxũ i nhuxma ngĩxũ jauxgũxũ i ngẽma dĩẽru i Tupanana ũcũ, rü nũmagũ rü ta Abráũmaã Meuquichedéna nanaxãgũ ga jema Tupanana ũxũ. Jerũ nũma ga Lewĩ rü guxũma ga nataagũ i nhuxma Judéugũarũ paigũ ixĩgũxũ, rü woo ga na taũta nabuexũ ga jexguma, notürũ marũ Abráũxũnewa najexmagũ ga jexguma Meuquichedé namawa Abráũpexegu janguxgu. Rü ngẽmawa nũxũ tacuax na guxũma i ngẽma paigũarũ jexera jĩixũ ja Meuquichedé. ¹¹Rü nuxcũmaxũgũxũ ga tórũ oxĩgũ ga Judéugũ, rü Lewítaagũ ga paigũmexẽwa nixĩ ga najauxgũãxũ ga Tupanaãrũ mugũ. Notürũ pemaã nũxũ chixu rü jexguma chi jema paigũ aixcuma jema Judéugũxũ imexẽẽgũgu ga Tupanapexewa, rü taxuũcax chima Tupana nũxũ naxuneta ga naĩ ga pai ga Meuquichedérũũ ixĩcũ ga tama Lewítaa ga Aráũrũũ ixĩcũ. Rü jemacax ga Tupana rü nũxũ naxuneta ga Nane ga

Ngechuchu na tóru chogüruũ ja pai jĩĩxũcax. ¹²Rü jemacax ga Tupana rü jema Judéguäru paigüchicüũxũ najangucuchixêê ga Cristu. Rü nüma nixĩ i nhuxma i aixcuma Tupanapexewa tüxũ jamexêégüxũ. Rü guxũma ga jema paigü rü Lewítaa nixĩgü jerü jemaäcü nixĩ ga namuãxũ ga jema mugü ga Muísé ümatüxũ. Notürü nüma ga Cristu rü marü nanaxüchicüü ga guxũma ga jema. ¹³⁻¹⁴Erü meãma nüxũ tacuax rü nüma ja tóru Cori ja Ngechuchu ja jima nachiga idexagücü rü tama Lewítaa nixĩ erü nüma rü Judátaa nixĩ. Rü nüxũ tacuax rü taxuũma ga Judátaa rü pai nixĩ, jerü ga Muísé rü jexguma jema paigüchiga jadexagu rü taxuũma ga Judátaaxũ naxuneta na pai jĩĩxũcax. ¹⁵Rü ngêmaäcü meã nangox na Tupana ijanaxoxêêxũ ga guxũma ga jema mugü ga Muísé ümatüxũ ga paigüchiga. Jerü nüma ga Tupana rü tüxna nanamu ga wüxi ga naĩ ga pai ga jexwacaxücü ga tama Lewítaa ixicü. Rü nüma nixĩ i tóru Cori jĩĩxũ ja Meuquichedéruũ ixicü, erü guxũma i ngêma togü i paigüaru jexera nixĩ. ¹⁶Rü guxũma ga jema togü ga paigü rü nangucu jerü Lewítaa nixĩgü. Notürü nüma ga Cristu rü paixũ ningucuchi jerü poramaã juwa ínarüda rü guxũguma namaxêcha na tüxũ nangüxêêxũcax. ¹⁷Rü ngêmacax i Tupanaãrü ore i ümatüxũwa rü tóru Corichiga nhanagürü:

“Cuma rü guxũgutáma duũxũgüaru ngüxêêruũ ja pai cuixi Meuquichedéruũ”,

nhanagürü. ¹⁸⁻¹⁹Rü jemacax ga Tupana rü nhama ga naãnewa nanamu ga Nane, jerü jema mugü ga paigüchiga

naxümatüxũ ga Muísé rü tama poraäcü tüxũ narüngüxêê jerü tama aixcuma tüxũ nimexêégü ga Tupanapexewa. Rü jemacax Nanexũ namu ga Tupana na tóru pecaducax najuxũcax na ngêmaäcü tüxũ nangêxmaxüçax i maxũ i taguma gúxũ rü aixcuma Tupanamüçügü ixĩgüxũcax. ²⁰⁻²¹Rü jexguma Tupana jema togü ga paigüxũ ngucuxêêgu, rü nanangucuxêêmare. Notürü jexguma Cristuxũ jangucuchixêêgu na tóru ngüxêêruũ ja pai jĩĩxũcax, rü nügüégagutama inaxuneta. Rü jemacax ga jexguma Cristuxũ jangucuchixêêgu rü nhanagürü:

“Chama i Cori ja Tupana rü marü cuxũ chaxuneta na guxũgutáma duũxũgüaru ngüxêêruũ ja pai cuiĩxũcax. Rü ngêma rü tagutáma chanaxüchicüü erü chaugüégagu ichaxuneta”,

nhanagürü. ²²Rü nhuxma na jemaäcü nügüégagutama inaxunetaxũ ga Tupana, rü nüxũ tacuax na aixcumaxüchima jema paigüaru jexera na jĩĩxũ ja Cristu erü guxũgutáma Tupanapexewa tüxũ narüngüxêê. ²³Rü jema togü ga paigü rü namuxüchi, jerü nijuetanü. Rü jemacax taxucürüwama guxũguma paigü nixĩgü. ²⁴Notürü nhuxma na tóru ngüxêêruũ ja paixũ jangucuchixũ ja Ngechuchu, rü ngêmacax marü taxuũcaxma texé ja togue tingucuchi, erü nüma ja Ngechuchu rü tagutáma naju. ²⁵Rü ngêmacax nixĩ i nhuxma i nüxũ natauxchaxũ na aixcuma tüxũ namaxêxêêxũ ja guxãma ja jíxema norü ngüxêêmaã Tupanaxütawa ngugüxe. Erü nüma ja Ngechuchu rü guxũguma namaxêcha na tümaétüwa

nachoguxũcax. ²⁶Rũ ngẽmaãcü ja Ngechuchu, rü nüxĩcatama nixĩ i pai ja tórũ ngũxẽerũ jĩixũ i Tupanapexewa. Erũ nüma rü aixcuma naxũüne, rü nataxuma i chixexũ i nawa, rü nangearũ pecaduãx jerũ taguma taxrũũ pecadu naxũ. Rũ nhuxma rü guxũétüwa nangẽxma i dauxũguxũ i naãnewa i Tupana íngẽxmaxũwa. ²⁷Rũ Ngechuchu rü tama ngẽma togũ i paigüerurũ nixĩ. Erũ nümagũ rü nanaxwaxe na guxũ i ngunexũgu Tupanacax naxũnagũ nađaixũ na ngẽmaãcü Tupana nüxũ nüxũ ngechaũxũcax i noxrĩtama pecadugũ rü guxũ i duũxũgüarũ pecadugũ ta. Notürũ nüma ga Ngechuchu rü jexguma nügũ inaxãxgu, rü wüxicanatama pecaducax naju. Rũ ngẽma rü guxũguma name i Tupanapexewa. ²⁸Rũ jema mugũ ga Muísẽ umatũxũ, rü duũxũgumarexũ naxuneta na paigüerugũ jixĩgũxũcax. Notürũ nümagũ rü ta nipecaduãxgũ. Notürũ jemawena ga Tupana rü nügüégagu Nanexũ naxuneta na tórũ ngũxẽerũ jĩixũcax. Rũ jima Nane rü guxũguma mecũxũchi ja tórũ Maxẽxẽerũ nixĩ. Rũ nüma rü guxũguma tüxũ narüngũxẽẽ i Tupanapexewa.

**Ngechuchu nixĩ ja tórũ
ngũxẽerũ i Tupanapexewa**

8 ¹Rũ ngẽma pemaã nüxũ tixuxchaũxũ i nhuxma nixĩ na tüxũ nangẽxmaxũ ja tórũ ngũxẽerũ ja mexẽchicũ i Tupanaxũtawa. Rũ nüma rü Tupana Nane ja Cristu nixĩ. Rũ dauxũguxũ i naãnewa i Tupanaãrũ tügüneçüwawa narũto erũ guxũãrũ ãẽxgacũ nixĩ. ²Rũ ngẽma

dauxũguxũ i naãnewa i ngẽma nachica i tüunexũ ga Tupana üxũwa nixĩ i taxcax ínacaxũ. Rũ tama ngẽma Judéugüarũ paigürũ wüxi ja ípata ja duũxũgũ üxũnewa Tupanana taxcax ínaca. ³Rũ guxũma i ngẽma Judéugüarũ paigüeru rü nangucu na Tupanana naxãgũãxũcax i ãmaregũ rü naxcax nadaiaũxũcax i naxũnagũ na Tupana nüxũ nüxũ ngechaũxũcax i duũxũgüarũ pecadugũ. Rũ jemacax ga Ngechuchu rü Tupanana nügũ naxãmare rü duũxũgüarũ pecaducax naju. ⁴Rũ nhuxma i nüma ja Ngechuchu rü dauxũguxũ i naãnewa nangẽxma na ngẽma tórũ ngũxẽerũ ja pai jĩixũcax i Tupanapexewa. Rũ ngẽmacax tama nhama i naãnewa nixĩ i pai jĩixũ. Notürũ ngẽxguma chi nhama i naãnewa nangẽxmagu rü tau chima pai nixĩ erũ nhama i naãnewa nangẽxmagũ i ngẽma Judéugüarũ paigũ i Tupanana ãmare ãgũxũ jema Muísẽarũ mugũ nüxũ ixuxũrũũ. Notürũ nüma ja Ngechuchu rü tama ngẽmarũ nixĩ erũ dauxũguxũ i naãnewa nixĩ i nangẽxmaxũ na ngẽma tüxũ nangũxẽxũcax. ⁵Notürũ ngẽma puracũ i nhama i naãnewa naxũgũxũ i ngẽma Judéugüarũ paigũ, rü naxcax nadauxũtaegũmare i ngẽma Ngechuchu dauxũguxũ i naãnewa üxũ. Rũ ngẽma nachica i nawa Tupanacax napuracüexũ i ngẽma paigũ, rü nanaxichicũnaxãgũmare i ngẽma nachica i Ngechuchu nawa ngẽxmaxũ. Rũ meãma nüxũ tacuax i ngẽma, jerũ jexguma Muísẽ naxũxchaũgu ga Tupanapata, rü Tupana rü nhanagürũ nüxũ:

“¡Dücax, meã nangugũ i ngẽma
cuaxruũ ga cuxũ chawéxũ ga
mãxpúne ga Chinaĩwa! Rũ

chanaxwaxe i ngëmaäcü na cunaxüxü”,
 nhanagürü. ⁶Notürü nüma ja tóru ngüxëëruü ja Cristu rü dauxüguxü i naãnewa nangëxma, rü ngëma aixcumaxüchi Tupanapexewa taétüwa nachogü. Rü ngëma Judéugüarü paigü rü nagu naxiãma ga jema nuxcümaxüxü ga uneta ga Muísé ümatüxü. Notürü nüma ja Tupana rü marü tüxna nanaxã i wüxi i ngexwacaxüxü i uneta erü tamaã nüxü nixu na Cristu jüxü ja aixcuma tóru ngüxëëruü ixücü. Rü nüma rü naju na Tupanapexewa tüxü jamexëëxüçax, rü ngëma Tupanaxütawa nangëxma i nhuxma na taétüwa nachogüxüçax. Rü ngëmaäcü nüxü tadau na Tupanaärü uneta i ngexwacaxüxü rü jema nuxcümaxüxü ga unetaarü jexera jüxü na namexü. ⁷Jerü jexguma chi jema nüxüraüxü ga uneta ga Muísé ümatüxü rü aixcuma namexgu na duüxügüxü jamaxëëëxüçax, rü marü taxuüçax chima tanaxwaxe i to i ngexwacaxüxü i Tupanaärü uneta. ⁸Notürü nüma ga Tupana rü nüxü nadau na tama aixcuma napexewa duüxügüxü jamexëëxü ga jema nüxüraüxü ga uneta ga Muíséna naxãxü. Rü jemacax ga Tupana rü nhanagürü:

“Wüxi i ngunexü rü wena táxaru guxüma i chorü duüxügümaã ichaxuneta. ⁹Notürü ngëma chorü uneta i ngexwacaxüxü, rü täüxütáma namaã nawüxigu ga jema nüxüraüxü ga chorü uneta ga nuxcümaxügüxü ga perü oxigümaã nüxü chixuxü ga jexguma nüxü charüngüxëëgu na

ínachoxüxüçax ga Ejituarü naãnewa. Jerü nümagü ga jema duüxügü rü tama chauga naxínüë rü tama najanguxëë ga jema nüxüraüxü ga chorü uneta, rü jemacax íchanawogü.

¹⁰Notürü ngëxguma nawa nanguxgu na wena namaã ichaxunetaxü, rü nhaäcü tá nixü i guxüma i Judéugümaã ichaxunetaxü: ‘Rü tá meãma ngëma duüxügüxü nüxü chacuaxëë i chorü mugü na aixcuma naãëwa nangëxmagüxüçax. Rü chama rü tá norü Tupana chixü, rü nümagü rü tá chorü duüxügü nixügu’. ¹¹Rü guxüma i ngëma duüxügü i choxü jaxögüxü, rü aixcuma tá choxü nacuaxgü. Rü ngëmacax taxuüçaxtáma tüxcüü nügümaã nüxü nixugügü i chauchiga na ngëmaäcü choxü nacuaxgüxüçax. Erü guxüma i chorü duüxügü rü aixcuma tá meã choxü nacuaxgü woo buxü rü exna jaxü. ¹²Rü tá nüxü nüxü changechaü i norü chixexügü, rü tá nüxü ichajarüngümaxüchi i norü pecadügü”,

nhanagürü ga Tupana. ¹³Rü dücax, nhuxma na Tupana ngexwacaxüxü i unetachiga idexaxü, rü ngëmawa nüxü tacuax na jema nüxüraüxü ga uneta rü marü nangupetüchaüxü. Rü nüxü tacuax rü guxüma i ngëma marü ngupetüchaüxü, rü paxa tá inajarüxo. Rü ngëmaäcü i ngëma Judéugüarü

paigü, rü marü inajarüoxchaũ na Tupanapexewa duũxũgüxũ nangũxẽxũ. Erü nûma ja Tupana rü marü Cristuxũ ningucuchixẽ na tórü ngũxẽeruũ jüüçax i napexewa.

**Tupanapata ga duũxũgü
üünechiga rü Tupanapata ja
dauũgüxũ i nañewa
ngẽxmanechiga**

9 ¹Rü jexguma nuxcûma Muísémaã jadexagu rü nüxna naxããgu ga jema nüxiraũxũ ga uneta, rü Tupana namaã nüxũ nixu na nhuxãcü nanaxwaxexũ na nüxũ jacuaxüũgüxũ. Rü jexgumarüũ ta namaã nüxũ nixu na nhuxãcü nanaxwaxexũ na naxçax naxüãxũ ga wüxi ga ïpata ga naxchirunaxçax na jéma nüxũ jacuaxüũgüxũçax ga paigü. ²Rü guma ïpata ga naxchirunaxçax rü nitüjemachĩã. Rü jema naxmachĩã ga nüxira nawa ixücuxũ, rü “Nachica i Üünexũ” nixĩ ga naéga. Rü jéma najexma ga werachica rü mecha ga põü ga üünexũ nagu nuxũ. ³Rü jema to ga naxmachĩã ga jema tüjemachĩãxũçaxwena üxũ rü “Nachica i Üünexũchixũ” nixĩ ga naéga. ⁴Rü jéma najexma ga jema mecha ga uirunaxçax ga ngextá nawa jagugüãxũ ga pumara ga paacaxũ ga jexguma jaguxgu. Rü jéma najexma ta ga jema baú ga Tupanaãrü mugü nagu namaã nanguxũgüxũ. Rü jema baú rü guxüwama uirumaã natüxüne. Rü jematama baúarü aixepewa najexma ga wüxi ga tüxüãcü ga uirunaxçax ga jema põü ga dauwüwa rüjixümaã äãcuxũ. Rü jexgumarüũ ta jema baúarü

aixepewa najexma ga Aráũãrü caxüruũ ga rüxüxüne, rü guma nutagü ga Tupanaãrü mugü nagu ümatügücü. ⁵Rü jema baúétüwa najexmagü ga jema taxre ga dauxüçüãxchicünaxãgü ga ixãpexatüxũ. Rü naxpexatügümaã najadüxétügü ga jema baúátaũ. Rü jema dauxüçüãxchicünaxãgüarü ngãxüwa nixĩ ga nügü nangoxẽxüxũ ga Tupana. Notürü taxuüçaxma tüxçüũ jexeraãcü nüxũ tixu i ngẽmachiga. ⁶Rü wüxicana jemaãcü na namexẽgüãxũ ga guxüma ga jema, rü nhuxmachĩ ga paigü rü guxüũguma jema nüxiraũxũ ga naxmachĩãgu nachocuxũ na jéma Tupana namaã nüxũ ixuxüãcüma nüxũ jacuaxüũgüxũçax. ⁷Notürü jema to ga naxmachĩãwa rü jema paigüarü äëxgacüxicatama nixĩ ga jexma ücuxũ. Rü tama guxüũguma jexma naxücu, notürü wüxicanatama jexma naxücu ga wüxichigü ga tauncügu. Rü jexguma jexma naxücuxgu rü jéma nanange ga naxünagü rü guma nagümaã jema baúxũ namaxcütü. Rü jemaãcü ga jema paigüarü äëxgacü rü inanaxã ga guma nagü na noxrütama pecadu rü guxüma ga duũxũgüarü pecaduxũ ijanangümaxüçax ga Tupana. ⁸Notürü jema paigüarü äëxgacüxicatama nixĩ ga jema Nachica ga Üünexũchixügu ücuxũ ga Tupana ïjexmaxüwa. Rü ngẽmaãcü Tupanaãe i Üünexũ tüxũ nüxũ nacuaxẽe na taxucürüwama jexma Tupana ïjexmaxügu nachocuxũ ga guxüma ga duũxũgü jerü jexguma nagu naxixgu ga jema mugü ga Muísé ümatüxũ rü nachuxu ga jema. ⁹Rü guxüma i ngẽma pemaã nüxũ chixuchigaxũ, rü wüxi i cuaxruũ nixĩ i taxçax i jixema na

nhuxma imaxẽxũ. Rũ ngẽmawa nüxũ tatau rũ jema ãmaregũ ga Tupanana naxãgũxũ rũ jema naxũnagũ ga Tupanacax nađaixũ rũ taxucürwama jema duũxũgũxũ nimexẽẽ na aixcuma Tupanapexewa jamexũcax. ¹⁰Rũ jema nuxcũmaxũgũxũ ga mugũ ga õnagũchiga rũ axeũgũchiga rũ nacũmagũchiga ixĩxũ, rũ jema duũxũgũarũ düxétũxũnecaxicatama nixĩgũ. Rũ jemaçax tama jema duũxũgũxũ nimexẽẽ na aixcuma Tupanapexewa jamexũcax. Rũ woo napora ga jema mugũ ga noxrix, notürũ jexguma ínguxgu ga Cristu rũ marũ jexma najacuax na duũxũgũmaã naporaxũ. ¹¹Notürũ i nhuxma rũ marũ ínganu ja Cristu. Rũ nüma nixĩ i aixcuma tórũ ngũxẽẽruũ jĩixũ i Tupanapexewa, rũ nagagu nixĩ i nangẽxmaxũ i maxũ i taguma gúxũ. Rũ ngẽma nachica i ngextá taétüwa ínachogũxũwa rũ aixcuma naxũüne erũ tama guma ípata ga naxchirunacax ga duũxũgũmare üxũnerũ nixĩ erũ dauxũgũxũ i naãnewa nangẽxma. ¹²Rũ Cristu rũ marũ dauxũgũxũ i naãnegu naxücu i ngextá Tupana íngẽxmaxũwa. Rũ taxuũcaxma tüxciũ wüxichigũ ja taunecügu ngẽxma naxücu, erũ marũ gũxũguma ngẽma nangẽxmaẽcha. Rũ jexguma jexma naxücuxgu, rũ tama jema nanange ga bodegũgũ rũ wocaxacügũgũ na Tupanana naxããxũcax. Notürũ nüma ga Cristu rũ nagütama inaxã na jemaãcü naxütanũãxũcax ga tórũ pecadugũ rũ tüxũ nangẽxmaxũcax i maxũ i taguma gúxũ. ¹³Rũ jema mugũ ga Muísé ümatüxũ rũ nhanagürũ:

“Ngẽxguma texẽ juetaxũ íngõgũgu, rũ taxucürwama Tupanapata ja naxchirunacaxgu taxücu”, nhanagürũ. Rũ jemaçax ga jema Judégũgũ, rũ jexguma wüxi ga juetaxũ jangõgũgũgu rũ nanaxwaxegũ ga na norũ paixũtawa nagaãxũ ga wüxi ga woca na jema pai Tupanacax jamáxũcax rũ na jaguãxũcax na jemaãcü ga guma tanimaca rũ dexágu nagũãxũcax na jema duũxũgũxũ namaã namaxcuxũcax na jemaãcü nüxna ínajixũcax ga norũ chixexũ. Notürũ jema rũ duũxũgũarũ düxétũxũnewaxicatama nanamexẽẽ rũ tama norũ maxũxũ namexẽẽ. ¹⁴Notürũ nagũ ja Cristu rũ jema naxũnagũgũarũ jexera name erũ tórũ maxũ namexẽẽ na aixcuma Tupanapexewa imexũcax. Rũ Cristu rũ woo Tupana Nane na jĩixũ rũ na nataxuxũ ga norũ chixexũ, notürũ Tupanana nügũ naxã rũ tórũ pecaduçax naju jerũ Naãẽ i Üünexũ nanaporaxẽẽ. Rũ jemaãcü curuchagu nanabaxẽẽ ga nagũ. Rũ nhuxma ja jima nagũ rũ ningü na tüxũ namexẽẽxũcax i Tupanapexewa. Rũ ngẽmacax taxuũcaxma tanaxwaxe na nagu ixĩxũ ga jema mugũ ga Muísé ümatüxũ ga tama tüxna naxãxũ i maxũ i taguma gúxũ. Rũ nhuxma na Cristugagu Tupanapexewa imexũ, rũ nüma ja Cristu rũ tüxũ narüngũxẽẽ na naxũxũcax i ngẽma Tupana ja maxũcü tüxũ naxwaxexũ. ¹⁵Rũ nhuxma na tórũ pecaduçax najuxũ ga Ngechuchu ja Cristu, rũ nüma nixĩ i tórũ ngũxẽẽruũ i Tupanapexewa, ngẽma Tupanaãrũ uneta i ngexwacaxũxũ nüxũ ixuxürũ. Rũ nhuxma i jixema i Tupana tüxũ idexechixe, rũ tüxũ nangẽxma i maxũ i taguma gúxũ ega jima Naneãxũ

jaxõgügu. Rü ngëxgumarüü ta i guxüma i Tupanaärü duüxügü ga nuxcüma jaxõgüxü, rü nüxü nangëxma i maxü i taguma gúxü jerü Cristu naju na norü pecaduna ínanguxüxëãxüçax. ¹⁶Rü ngëxguma najuxchaügu i wüxi i duüxü, rü wüxi i poperagu nanaxümatü na texé tá najaxuxü i norü ngëmaxügü. Notürü ngëxguma namaxügu i ngëma duüxü, rü taxucürüwama texé tanajaxu i norü ngëmaxügü. ¹⁷Rü ngëmacax i ngëma popera rü tama napora i ngëxguma namaxügu i ngëma duüxü. Rü ngëxguma najuxguxicatama nixü i naporaxü. ¹⁸Rü nüma ga Cristu rü norü jumaã nixü ga Tupanapexewa tüxü jamexëëgüxü. Jerü ga Muisé rü nüxü nixu rü jexguma texé pecaduãxgu rü tanaxwaxe na tümaärü paixütawa tanagaxü ga wüxi ga naxüna na tümaégagu najuxëëãxüçax rü inabaãxüçax ga nagü na Tupana tüxü nüxü ngechaüxüçax ga tümaärü pecadu. ¹⁹Rü Muisé rü guxüma ga duüxügüpexewa nüxü nixu ga guxüma ga Tupanaärü mugü. Rü jemawena nanajaxu ga wocaxacügügu rü bodexacügügu, rü dexámaã nanaxüéü. Rü nhuxmachi nanajaxu ga wüxi ga naïxchacüüxácü rü nhuxre ga tüaxmü ga dauxüne, rü jema naïxchacüügu nanabagümü. Rü jemamaã guma nagüwa nanacüé rü nhuxmachi nanamaxcüétü ga jema popera ga Tupanaärü mugü nawa jemaxü. Rü jexgumarüü ta najamaxcutanü ga guxüma ga duüxügü. ²⁰Rü nhuxmachi ga Muisé rü nhanagürü nüxü ga duüxügü:

“Tupana rü marü inaxuneta na pexü tá nangüxëëxü. Rü daa nagümaã pexü chimaxcutanü i

nhuxma erü ngëmaãcü nixü i choxü namuxü na ngëmawa nüxü pecuáxüçax na aixcuma tá pexü nangüxëëxü”,

nhanagürü. ²¹Rü nhuxmachi ga Muisé rü guma nagümaã nanamaxcüétü ga guma ípata ga naxchirunaxçax ga nawa Tupanaxü jacuaxüügüne. Rü jexgumarüü ta nanamaxcutanü ga guxüma ga jemaxügü ga namaã Tupanaxü jacuaxüügüxü ga guma ípataarü aixepewa jexmagüxü. ²²Rü nüxü tacuax rü jema duüxügü ga jexguma pecadu naxügügu rü Tupanapexewa nügu jamexëëgüchaügu, rü norü paigüxütawa nanaga ga wüxi ga naxüna na nüxü jamáãxüçax rü inabagüxëëãxüçax na Tupana tama napocueüçax. Notürü nhuxma ja Tupana rü tüxü nüxü nangechaü i tórü chixexü jerü tórü pecaduçax naju ga Ngechuchu rü nagü inanaba. Rü jexguma chi tau chima najuxgu rü nagü inabaãgu, rü taxucürüwa chima Tupana tüxü nüxü nangechaü i tórü pecadugü.

**Cristu rü naju na
íjanaxoxëëãxüçax i pecadu**

²³Rü jemacax ga Tupana rü nuxcümaxüchima Muisémaã nüxü nixu na paigü duüxügüarü pecaduçax naðaixü ga naxünagü rü inabaãxü ga nagü na jemaãcü Tupana tama napocueüçax ga duüxügü. Notürü i nhuxma i jixema na Tupana tüxü idexechixü, rü tüxü nangëxma i tachica i dauxügüxü i nañewa jerü Nane ja Cristutama tórü pecaduçax naju rü inanaba ga nagü. Rü jima nagü rü Tupanapexewa rü poraãcü ngëma

naxûnagügüarü jexera narüporamaẽ.
²⁴Rü ngẽmacax i nhuxma rü taxuũcaxma tÿxcüü guma ïpata ga naxchirunaxcax ga duũxügü üxûnegu naxücu ja Cristu na ngẽma taétüwa nachogüxücax. Erü nüma ja Cristu rü marü Tupanaxütawaxüchi nangu i dauxüguxü i naãnewa. Rü ngẽma Nanatüpezewa nangẽxma i nhuxma na ngẽma taétüwa nachogüxücax. ²⁵Rü ngẽmacax i nhuxma rü taxuũcaxma tÿxcüü guxüguma Nanatüna nügü naxãẽcha na ngẽmaãcü taxcax najuuuxücax. Rü jema Judéugüarü paigüarü ãẽxgacügü rü gúcü ga taunecügügu guma ïpata ga üünenegu nachocuxü na jéma Tupanana naxãgüãxücax ga guma naxûnagügü.
²⁶Notürü ja Cristu, rü taxuũcaxma tÿxcüü gúcü ja taunecügügu Tupanana nügü naxãẽcha, erü ngẽxguma chi ngẽmaãcü jixügu rü chi noxri naãne ixügügumama rü chi marü muẽxpüxcüna taxcax naju. Notürü nhamaücüü ga Cristu rü marü nhama ga naãnewa nangu na wüxicanatama nügü inaxãxücax rü pecaducax najuxücax.
²⁷⁻²⁸Rü ngẽma na wüxicanatama najuxü i duũxügü naxüpa na Tupanapexewa nangugüxü, rü jexgumarüütama ga Cristu rü wüxicanatama nügü inaxã rü naju na ijanaxoxẽãxücax i muxüma i duũxügüarü pecadugü. Notürü wena taxarü núma naxü. Rü ngẽxguma wena núma naxüxgu rü tama pecaduarü oxẽewa tá núma naxü. Notürü tá núma naxü na namaxẽxẽãxücax i guxüma i ngẽma duũxügü i aixcuma ínanguxẽẽgüxü.

10 ¹Rü jema mugü ga Muisé ümatüxü rü íraruwatama jema duũxügücax nanangoxẽẽ ga tacü tá na naxüxü ga Cristu. Notürü ga jema mugü rü tama aixcuma Cristurüü napora, jerü taxucürüwama Tupanapexewa najamexẽẽ ga jema duũxügü woo gúcü ga taunecügügu Tupanacax nanadaixü ga naxûnagü na jemaãcü Tupanana nangaicamagüxücax. Rü jemaãcü ga jema mugü rü taxucürüwama Cristurüü nanamaxẽẽẽ ga jema duũxügü. ²Rü jexguma chi jema mugü aixcuma jema duũxügüxü ímexẽẽgu ga Tupanapexewa, rü tau chima nagu narüxinüẽẽcha na japedaduãxü, rü chi nüxü narüxoe na naxûnagü Tupanacax naðaixü. ³Notürü jema na Tupanacax naxûnagü naðaixü ga duũxügü, rü norü pecaduarü cuãxãchixẽẽruümare nixü ga gúcü ga taunecügügu. ⁴Jerü guma nagü ga jema wocagü rü bodegü rü tama napora na ijanaxoxẽẽãxücax ga pecadugü. ⁵Rü jemacax ga Cristu ga jexguma nhama ga naãnewa naxüxchaügu, rü Nanatüxü nhanagürü:

“Tama cunaxwaxe na naxûnagü cuxcax naðaixü i duũxügü na naxütanügüãxücax i norü pecadugü. Notürü cunamexẽẽ i nhaã chaxune na ngẽmamaã chanaxütanüxücax i pecadu. ⁶Rü tama namaã cutaãe i ngẽma naxûnagü i cuxna naxãmaregüxü rü cuxcax naðaixü rü jagugüxü na naxütanügüãxücax i norü pecadugü. ⁷Rü jemacax rü nhacharügü: ‘Dücax, Pa Chaunatüx, daxe chixü, rü nuã cupexewa changẽxma na

chanaxüxcax i curü ngúchaũ rü
na chajuxüxcax, ngêma curü
orewa chauchiga
naxümatüürüü', nhacharügü".

⁸Rü jemaäcü ga Cristu rü nüxü nixu na
Tupana rü tama aixcuma namaã
nataãxü ga jema na naxcax nadaiãxü
ga naxünagü rü naxcax jagugüãxü na
naxütanügüãxüxcax ga norü pecadugü
woo jema mugü ga Muísé ümatüxüwa
rü duüxügüxü namu na naxügüãxü ga
guxüma ga jema. ⁹Rü jemawena ga
Cristu, rü nhanagürü ta:

“Dücax, Pa Chaunatüx, daxe chixĩ,
rü nuã cupexewa changêxma
na chanaxüxcax i curü
ngúchaũ rü duüxügüarü
pecaducax na chajuxüxcax”,

nhanagürü. Rü jemawa nüxü tacuax na
Tupana rü marü ijanaxoxêãxü na
naxünagü naxcax nadaixü, jerü Nanexü
ningucuchixêê na pecaducax najuxü. ¹⁰Rü
nhuxma na Ngechuchu ja Cristu naxüxü
ga jema Tupanaärü ngúchaũ, rü
ngêmacax nixĩ i nhuxma i Tupanapexewa
ixüünexü i jixema. Jerü nüma ga Cristu rü
Tupanana nügü naxã na wüxicanatama
guxãärü pecaducax najuxü. ¹¹Rü guxüma
i Judégüarü paigü rü wüxichigü i
ngunexügu rü tupaucawa nangêxmagüxü
na Tupanana naxägüãxüxcax i naxünagü i
naxcax nadaiixü. Rü guxüguma jemaäcü
nanaxügüxü notürü taguma aixcuma
inajarixo ga norü pecadugü woo jemaäcü
na naxügüãxü. ¹²Notürü nüma ga
Ngechuchu ja Cristu rü wüxicanatama
Tupanana nügü naxã na guxãärü
pecaducax najuxüxcax. Rü jemawena rü
nhuxmachi dauxüwa naxü rü Tupanaärü
tügünecüwawa najarüto, erü guxãärü

ãêxgacü nixĩ i nhuxmax. ¹³Rü ngêma nixĩ
i nangêxmaxü nhuxmatáta ja Tupana rü
guxüma i norü uwanügüxü nüxü
najexeraxêê. ¹⁴Rü nüma ga Ngechuchu ja
Cristu rü wüxicanatama Tupanana nügü
naxã rü naju na guxüguma
Tupanapexewa timexüxcax ja jixema
Tupanacax tüxü jaxüünexêégüxe. Rü
ngêmacax i nhuxma rü taxuüxcaxma
tüxcüü wena nügü inaxã rü naju, jerü
wüxicanatama guxüma ningutanüxêê.
¹⁵⁻¹⁶Rü Tupanaãê i Üünexü rü tüxü nüxü
nacuaxêê na aixcuma jüixü i ngêma, jerü
nüma ga Tupana rü nhanagürü:

“Ngêxguma nawa nanguxgu na
wena ngêma Judégümaã
ichaxunetaxü, rü wüxi i
ngexwacaxüxü i uneta tá nüxna
chaxã. Rü tá meã ngêma
duüxügüxü nüxü chacuaxêê i
chorü mugü na aixcuma
naãêwa nangêxmagüxüxcax rü
guxüguma naga naxünêxüxcax.
¹⁷Rü tá nüxü
ichajarüngümaxüchi i ngêma
duüxügüarü pecadugü rü
ngêma chixexü i naxügüxü. Rü
tagutáma wena nagu
charüxĩnü”,

nhanagürü. ¹⁸Rü ngêmaäcü nüxü tacuax
rü ngêxguma Tupana duüxügüaxü nüxü
ngechaügu i norü pecadugü, rü marü
taxuüxcaxma tüxcüü nanaxwaxe na wena
tacü i naxünagü nüxna naxägüxü
naxcax i pecadu.

Name nixĩ i Tupanana tangaicamagü

¹⁹⁻²⁰Rü ngêmacax i nhuxma, Pa
Chaueneëgü, rü taxuüxcaxma tüxcüü

tamuũe na Tupana íngẽxmaxũwa ichocuxũ na namaãxũchi idexagũxũcax. Rũ nuxcũmaxũchima rũ paigũarũ ãẽxgacũxicatama jexma naxũcu nagu ga guma ípata ga naxchirunaxcax ga Tupana nawa jexmane. Rũ taxucũrũwama ngexerũxũxemare jexma taxũcu. Notũrũ nũma ga Ngechuchu ja Cristu rũ marũ inajanaxoxẽẽ ga guxũma ga jema ga jexguma curuchagu najuxgu rũ nagũ inabaãgu na Tupana íngẽxmaxũwa tũxũ jachocuxẽẽxũcax rũ namaãxũchi idexagũxũcax. Rũ woo taxucũrũwama Tupanana tangaicamagũ ga noxrix, notũrũ nũma ga Cristu rũ naju na tũxũ namaxẽẽxũcax. Rũ nagagu nixĩ i nhuxma i Tupanaxũtawa íngugũxũ. ²¹Rũ nũma nixĩ i Tupanapexewa tũxũ nangũxẽẽxũ i guxãma i jixema i Tupanaãrũ duũxũgũ íxĩgũxe. ²²Rũ nhuxma na tũxũ nangẽxmaxũ ja tũrũ ngũxẽẽruũ i Tupanapexewa, rũ tanaxwaxe i aixcuma mexũ i taãemaã Tupanana tangaicamagũ na namaãxũchi idexagũxũcax. Rũ tanaxwaxe i aixcuma tajaxõgũ na nũma rũ tá meã tũxũ najaxuxũ jerũ Cristu rũ taxcax naju na tũxũ íjanaxoxẽẽãxũcax i tũrũ chixexũ rũ jemacax marũ naẽgagu ítabaiũ. ²³Rũ tanaxwaxe i aixcuma meã Cristuaxũ tajaxõgũeche jerũ nagũmaã tũxũ inajanaxoxẽẽ ga tũrũ chixexũ. Rũ ngẽmacax ítananguxẽẽ na wena taxaru núma naxũxũ na Nanatũxũtawa tũxũ nagagũxũ. Rũ taguma tanaxwaxe na nũxũ rũxoxũ na jaxõgũxũ, rũ bai i íraruwa. Erũ Tupana ga tamaã íxunetacu na tũxũ nangũxẽẽxũ, rũ aixcumaxũchi tá najanguxẽẽ i guxũma

ga jema tamaã nũxũ jaxuxũ. ²⁴Rũ nhuxma na ngẽmaãcũ tũxũ nangũxẽẽxũ ja Tupana, rũ name nixĩ i guxũguma naxcax tadaugũ na nhuxãcũ wũxichigũ jigũ rũngũxẽẽgũxũ na jexeraãcũ jigũ ingechaũgũxũcax rũ mexũ íxũgũxũcax. ²⁵Rũ name nixĩ i guxũguma tũrũ ngutaquexegũwa na íngugũxũ. Erũ nũmaxũ rũ marũ nũxũ narũxoe na ngutaquexewa naxĩxũ, rũ tama tanaxwaxe na ngẽxgumarũ íxĩgũxũ. Rũ ngẽmacax name nixĩ i jigũaxũ tanangũchaũxẽẽ na íngutaquexegũxũ. Rũ nhuxma na nũxũ icuãxũ na marũ jangaicaxũ ja tũrũ Cori, rũ jexeraãcũ tanaxwaxe na jigũaxũ nangũchaũxẽẽxũ. ²⁶Notũrũ ngẽxguma chi texẽ Cristuaxũ jaxõchirẽxgu ga noxrix rũ nhuxmachi noxtacũma nũxũ tarũxoxgu, rũ marũ nataxuma na nhuxãcũ namexẽẽxũ i ngẽma tũmaãrũ pecadu i Tupanapexewa. ²⁷Erũ ngẽxguma chi ngẽmaãcũ noxtacũma Cristuxũ tarũxoxgu, rũ aixcumaxũchi tá tanajaxu i ngẽma pocu i ãũcũmaxũ i Tupana tá tũxũ namaã pocuxũ rũ jima ùxũ ja íjaurane ja nawa tá ínaguxũne i ngẽma Tupanaãrũ uwanũgũ. Rũ ngẽxicatama nixĩ i tũxũ ínangũxẽẽxũ ja jixema Cristuxũ rũxoxe. ²⁸Rũ nũxũ tacuax rũ jexguma texẽ tama Muĩsarũ mugũga ínũgu rũ najexmagu ga taxre rũ exna tamaẽxpũx ga duũxũgũ ga tũxũ daugũxũ rũ tũxũ íxũgũxũ na aixcuma tama naga taxĩnũxũ, rũ ãẽxgacũgũ rũ noxtacũma tũxũ nimaxgũ rũ tama nũxũ tangechaũtũmũũgũ. ²⁹Notũrũ Tupana rũ aixcuma jexeraãcũ tá nanapocue i ngẽma duũxũgũ i tama Nanega ínũẽxũ rũ jima nagũ ja pecaduarũ piruũxũ oexũ

rü Naãe i Úünexũ i nüxũ ngechaũxũmaã guxchigagũxũ. ³⁰Rü meãma nüxũ tacuax rü Tupana rü tama notũcaxma nhanagürü:

“Chama tá nixĩ i namaã nüxũ chacuáxũ na tacü tá namaã chaxũxũ i guxũma i ngẽma chixexũ ügũxũ. Rü aixcuma tá chanapocu”,

nhanagürü. Rü jexgumarũĩ ta nhanagürü:

“Chama tátama nixĩ i nüxna chaçaxũ i wüxichigü i chorü duũxũgü i norü maxũchiga”,

nhanagürü. ³¹Rü dücax, rü aixcuma namaxũ ja Tupana, rü ngẽmacax ega tama naga ixĩnüẽgu rü wüxi i ãũcũmaxũchixũ nixĩ na namexgu inguxũ na tüxũ napocuxũcax. ³²Rü dücax, name nixĩ i nüxna pecuaxãchie ga nhuxãcü na jĩxũ ga jexguma noxri Cristuxũ pejauxgu. Rü jexguma ga pema rü jema na pejaxõgũxũgagu rü poraãcü guxchaxũgü pexũ nangupetü, notürü tama Cristuxũ perüoxe rü bai ga íraruwa. ³³Rü nhuxre ga pema rü duũxũgü pemaã naguxchigagü rü guxãpexewa pexũ niçuaixgü. Rü toguax ga pema rü pegü ipejaxãgü na jema pemücügürüü ngũxũ peingegũxũcax. ³⁴Rü pema rü pexũ nangechaũtũmũũgü ga jema petanũxũgü ga jaxõgũxũ ga pocupataũwa jexmagũxũ. Rü taãẽacũma jaxna namaã pexĩnüẽ ga jema tama jaxõgũxũ ga pexna napuxũxũ ga perü jemaxũgü. Rü tama naxcax pexoegaãe, jerü meãma nüxũ pecuax rü dauxũguxũ i naãnewa pexũ nangẽxma i ngẽma perü ngẽmaxũgüarü jexera ixĩxũ, erü tagutãma nagux. ³⁵Rü ngẽmacax i

nhuxmax, rü tama name na nüxũ perüoxexũ na Cristuaxũ pejaxõgũxũ woo tacü pexũ üpetügu. Erü marü nüxũ pecuax rü Tupana rü aixcumaxũchi tá pexna nanaxã i perü ãmare i maxũ i taguma gũxũ, erü Cristuaxũ pejaxõgü. ³⁶Rü ngẽma guxchaxũgü i pexũ ngupetũxũ, rü name nixĩ i jaxna namaã pexĩnüẽ na penaxũxũcax i Tupanaãrü ngũchaũ rü penajaxuxũcax i ngẽma ãmare i pemaã inaxunetaxũ. ³⁷Erü Tupanaãrü ore i ümatixũwa rü nhanagürü:

“Paxaxũchi tá wenaxãrü núma naxũ ja Cristu. Rü aixcuma tãũxũtãma nuxcü ínangu.

³⁸Notürü jixema tũmaãrü õgagu chapexewa mexẽ, rü name nixĩ i guxũguma tajaxõõcũma chauxcax tamaxũ. Notürü ngẽxguma nüxũ tarüxoxgu na tajaxõxũ, rü chama rü tãũxũtãma tũmamaã chataãe”,

nhanagürü. ³⁹Notürü i jixema rü tama ngẽma duũxũgü i nüxũ rüoxexũ i Tupana tá pocuexürüü tixĩgü. Erü jixema rü ngẽma jaxõgũxũtanũxũ tixĩgü, rü ngẽmacax tüxũ nangẽxma i maxũ i taguma gũxũ.

Tóru õchiga

11 ¹Rü nhuxma rü tóru õgagu nixĩ i nüxũ icuáxũ na aixcuma tá najauxgũxũ i guxũma i ngẽma irünguxẽẽgũxũ ga Tupana tamaã ixunetaxũ. Rü ngẽma tóru õgagu nixĩ i nüxũ icuáxũ na aixcuma Tupana tá janguxẽẽxũ i ngẽma norü uneta i nhuxma taũta nüxũ idauxũ. ²Rü nhuxre

ga nuxcümaũgũxũ ga tórũ oxigũ rü
 Tupanaãxũ najaxõgũ, rü jemacax ga
 Tupana rü namaã nataãẽ. ³Rü ngẽma
 tórũ õgagu nixĩ i nüxũ icuáxũ na
 aixcuma jĩixũ na Tupana rü norũ
 oremaãmare nangoxẽẽãxũ ga nhama ga
 naãne rü uãxcü rü tawemacü rü
 woramacurigü rü õtagü. Rü jemaãcü
 ga Tupana, rü ngürüwa
 nanangoxẽẽmare ga guxũma i ngẽma
 nhuxma nüxũ idauxũ. ⁴Rü guma
 nuxcümaxũcü ga Abéu rü Tupanaãxũ
 najaxõ. Rü jemacax Tupanaga naxĩnü rü
 nüxna nanaxã ga wüxi ga naxũna ga
 Tupanacax jamáxũ. Notürü ga naẽneẽ
 ga Caĩ rü tama Tupanaga naxĩnü rü
 tama nüxna nanaxã ga jema ãmare ga
 Tupana nüxũ naxwaxexũ. Rü jemacax
 ga Tupana rü woo tama Caĩmaã nataãẽ,
 notürü Abéumaã nataãẽ rü nüxũ nixu
 na mecü jĩixũ jerü najaxõ rü naga
 naxĩnü. Rü ngẽmacax i nhuxmax na
 woo najuxũ ga Abéu, notürü wüxi i tórũ
 cuãxruũ nixĩ. Erü nawa nixĩ i nüxũ
 icuáxũ na Tupana naxwaxexũ na
 jaxõgũxũ rü naga ixĩnüẽxũ. ⁵Rü Enoqui
 rü ta Tupanaãxũ najaxõ rü naga naxĩnü.
 Rü jemacax nixĩ ga namaxãcütama
 jagaãxũ na tama najuxũcax. Rü
 namücügü rü taguma nüxũ inajanguãgü,
 jerü Tupana najaga. Rü Tupanaãrũ ore i
 õmatüxũwa nüxũ nixu rü jexguma taũta
 jagaãgu, ga Enoqui rü nanaxü ga jema
 Tupana naxwaxexũ. ⁶Notürü taxuacüma
 Tupana tamaã nataãẽ ega tama nüxũ
 jaxõgũgu. Rü jixema Tupanamaã
 ãmücüchaũxẽ, rü tanaxwaxe na
 tajaxõxũ na aixcumaxũchi nangẽxmaxũ
 ja Tupana rü nüma rü aixcuma tüxũ
 nangũxẽẽxũ ja jixema naxcax daugüxe

rü naga ãnüẽxẽ. ⁷Rü jexguma Noémaã
 jadexagu ga Tupana, rü nüma ga Noé rü
 najaxõ rü naga naxĩnü. Rü Tupana rü
 namaã nüxũ nixu rü tá na ãnanguxẽẽãxũ
 ga mucü ga taxüchicü ga taguma
 duũxũgü nüxũ daucü rü tá guxũwama
 inanguanexẽẽcü. Rü namaã nüxũ nixu
 ga na naxũãxũcax ga wüxi ga wapuru
 ga taxũne na tama najuexũcax ga nüma
 rü namax rü nanegü rü naneãxgü. Rü
 Tupanaga naxĩnü ga Noé, rü nanaxü ga
 guma wapuru, rü jemaãcü tama najue
 ga nüma rü napatacũãx. Rü jemaãcü
 Tupanaãxũ najaxõ. Notürü jema togü ga
 duũxũgü rü tama najaxõgü, rü jemacax
 Tupana nanapocue. Notürü nüma ga
 Tupana rü Noéxũ nixu na napexewa
 namexũ, jerü nüxũ najaxõ. ⁸Rü guma
 tórũ õxi ga Abráũ, rü Tupanaãxũ najaxõ.
 Rü jemacax nixĩ ga naga naxĩnüxũ rü
 nüxna jaxũxũ ga nanatüchiũãne na
 nawa naxũxũcax ga jema naãne ga
 Tupana tá nüxna ãxũ na noxrüxũchi
 jĩixũcax. Rü jemaãcü nanaxü ga
 jexguma Tupana namuxgu. Rü
 nanatüchiũãnewa inaxũãchi ga Abráũ
 woo tama nüxũ na nacuáxũ ga ngextá tá
 na naxũxũ. ⁹Rü jexguma nawa
 nanguxgu ga jema naãne ga Tupana
 namaã ixunetaxũ, rü nhama jexma
 naxũãneãxũrüũmare ipata ga
 naxchirunaxcaxmaãmare naxãchiũ. Rü
 jexgumarüũtama nixĩgü ga nane ga
 Isaqui rü nataa ga Jacú, jerü jexguma
 najaequ rü Abráũrüũ nhama jexma
 naxĩãneãxũrüũmare nixĩgü ga jema
 naãnewa. Rü jemaãcü nixĩgü ga guxũma
 ga nümagü ga na woo Tupana rü namaã
 inaxunetaxũ ga na noxrüxũchi jĩixũcax
 ga jema naãne. ¹⁰Rü jemaãcü ga Abráũ,

rū woo nhama jexma
 naxūāneāxūrūūmare jéma najexma,
 notürü Tupanaāxū najaxōchigūama,
 jerü nüxū nacuax na Tupana tá
 dauxūguxū i naānewa na nagaxū nawa
 ja jima īāne ja nūmatama naxūxūne ja
 tagutāma ijarūxoxūne. ¹¹Rū
 jexgumarūūtama ijixī ga Abrāū namaç
 ga Chara. Rū woo ga na taguma
 naxāxācūchiréxū jerü marü ijaxūchi,
 notürü ixāxācū jerü ijaxōōma na
 Tupana rū aixcuma tá janguxēēxū ga
 jema norü uneta ga tá na naxāxācūxū.
¹²Rū jemaācū ga Abrāū rū woo marü
 jaguāxūchi na jīixū, notürü düxwa nüxū
 najexma ga wūxi ga nane, rū gumawa
 ne naxī ga muxūma ga nataagū. Rū
 nhuxma rū nhama ēxtagürüī
 namuxūchi, rū nhama naxnūcū ja
 taxuacūma jaxugūcürüī nixīgū, jerü
 jemaācū Abrāūmaā inaxuneta ga
 Tupana. ¹³Notürü nūmagū ga Abrāū rū
 Isaqui rū Jacú rū najue, rū jemacax
 tama nüxū nadaugū ga guxūma ga
 nataagū i nhuxma ngēxmagūxū, rū tama
 namaā inacuaxgū ga jema naāne ga
 noxri Abrāūmaā nüxū jaxuxū ga
 Tupana. Notürü Tupanaāxū
 najaxōgūama, rū jemacax nüxū
 nacuaxgū rū Tupana rū tá aixcuma na
 janguxēēxū ga jema norü uneta ga
 namaā nüxū jaxuxū. Rū nataāēgū jerü
 nüxū nacuaxgū na tāxūxūtāma
 guxūguma nhama ga naānewa na
 najexmagūechaxū, rū jemacax nüxū
 nixugūe na to i nachīūānecūāxruūmare
 jixīgūxū ga nhama ga naānewa. ¹⁴Rū
 nūmagū rū jema oremaā meāma tūxū
 nüxū nacuaxēē na tama nhama ga
 naānegucicatama naxīnūēxū notürü

īnanguxēēgūāxū i to i nachica i
 dauxūguxū i naānewa ngēxmaxū. ¹⁵Rū
 nūmagū rū jexguma chi nanaxwaxegūgu
 ga naxçax na nawoeguxū ga jema naāne
 ga noxri nawa ne naxīxū, rū tau chima
 nüxū naguxcha rū chi naxçax nawoegu.
¹⁶Notürü ga nūmagū rū nüxū
 nangūchaūgū i ngēma naāne i
 mexēchixū i dauxūwa ngēxmaxū i
 Tupanaxūtawa. Rū jemacax nixī ga
 Tupana ga tama naxānēxū na nūgū
 jaxuxū na norü Tupana jīixū. Jerü nūma
 ga Tupana rū naxçax nanamexēē ga
 wūxi ga īāne ja dauxūguxū i naānewa
 ngēxmane. ¹⁷⁻¹⁸Rū Tupana ga noxri rū
 Abrāūmaā nüxū nixu rū nhanagürü:
 “Cune ja Isaquiwa tá cuxū
 nangēxma i muxūchixūtama i
 cutaagū”,
 nhanagürü. Rū Abrāū rū najaxō na
 Tupana rū aixcumaxūchi tá na
 janguxēēxū ga jema namaā
 inaxunetaxū. Rū jemacax ga jexguma
 Tupana nüxū ūxgu rū Isaquicax nüxna
 nacaxgu na naxçax jamāāxūcax, rū
 nūma ga Abrāū rū tama nanachuxu. Rū
 ínamemare na Tupanacax jamāāxū ga
 guma nane ga nūgūmaā wūxicacū.
¹⁹Jerü nūma ga Abrāū rū najaxō na
 Tupanaāxū natauxchaxū na wena
 namaxēēēxū i juexū. Rū jemacax ga
 Abrāū rū ínamemare na Tupanacax
 nanexū jamāxū jerü najaxō na Tupana
 rū wena tá namaxēēēxū. Rū
 aixcumaxūchi jemaācū Abrāūcax
 nanaxū ga Tupana, jerü woo nhama
 marü najuxūrūī nixī ga nane, notürü ga
 Tupana rū maxūcū nüxna nanamu. Rū
 jema rū wūxi ga tórü cuaxruū nixī na
 nhuxācū aixcuma jaxōōxū ga Abrāū.

²⁰Rü guma Isaqui rü ta Tupanaãxú najaxõ. Rü jemacax ga jexguma marü najaxgu, rü najumuxê rü Tupanana naca na nanegü ga Jacú rü Echaúxü nangüxêxüçax. Rü jemaäcü najumuxê jerü aixcuma najaxõ na Tupana tá janguxêxü ga jema nüxna naxçax naçaxü. ²¹Rü guma Jacú rü ta Tupanaãxü najaxõ. Rü jemacax ga jexguma marü najaxgu rü najuxchaügu, rü norü caxüxümaã nügü inachixê rü Tupanaxü nicuaxüü. Rü najumuxê rü Tupanana naca na nataagü ga Juche nanegüxü nangüxêxüçax. Rü jemaäcü najumuxê jerü aixcuma najaxõ na Tupana tá janguxêxü ga jema Abráümaã inaxunetaxü. ²²Rü guma Juche rü ta Tupanaãxü najaxõ. Rü jemacax ga jexguma najuxchaügu, rü natanüxümaã nüxü nixu rü nhanagürü:

“Tataagü rü jixçura rü tá ínachoxü i nuã Ejituanewa na nawa naxixüçax i ngéma naãne ga Tupana tórü oxí ga Abráümaã nüxü ixuxü. Rü ngêxguma ngéma naxixgu, rü chanaxwaxe ja chauxchinaxägü rü ta ngéma nanana na ngêxma jataxgüãxüçax”,

nhanagürü. ²³Rü jemawena rü mucüma ga taunecügü rü nimu ga jema düüxügü ga Ejituanewa. Rü jema nachüãneärü äëxgacü, rü tama nanaxwaxe na jexeraäcü jamuëtanüxü, rü jemacax nanamu na tüxü naðaixüçax ga guxãma ga buxe ga ijatüxe ga jexwacax ibuetanüxê. Notürü nanatü rü naë ga guma tórü oxí ga Muísé, rü aixcuma Tupanaãxü tajaxõgü. Rü jemacax ga jexguma noxri nabuxgu ga Muísé, rü

tamaëxpüx ga tawemacügu itajacuxgü, jerü nüxü tadaugü na namexêchixü rü tama naxçax tamuüë ga jema Ejituanearü äëxgacüarü ore ga woo na naxunagüãxü ga na buxe tüxü naðaixü. ²⁴⁻²⁵Rü Muísé rü ta Tupanaãxü najaxõ. Rü jemacax ga jexguma marü najaxgu rü tama nanaxwaxe na nügü jaxuxü na Ejituanearü äëxgacüxacü ngíne na jixü, jerü naxçax rü narümemã na natanüxügü ga Judéugümaã wüxigu ngúxü jangexü. Rü tama nanaxwaxe na çacü ga nhama ga naãneärü chixexümaã nügü na nataãêxêxü, jerü nüxü nacuax rü jema taãê rü paxaächiruümare nixí. ²⁶Rü jexgumarüü na dauxüguxü ga naãnena na jaxüxü ga Cristu na ngúxü jangexüçax, rü jexgumarüü ta nixí ga Muísé ga äëxgacüpatana na jaxüxü, jerü naxçax rü narümemã na natanüxügü ga Judéugümaã wüxigu ngúxü jangexü. Notürü taxuüçaxma jema ngúxügu narüxínü, jerü nüxü nacuax rü tá wüxi i ngunexügu Tupanaxütawa na najauxãxü i norü natanü. ²⁷⁻²⁸Rü jema na jaxõõxüçax nixí ga Tupanaga naxínüxü ga Muísé. Rü jemacax ga jexguma Tupana namuxgu ga na naxüãxü ga üpetüchiga, rü najanguxêë ga jema Tupana namuxü. Rü nüma ga Muísé rü guxüma ga natanüxügü ga Judéugüxü namu na wüxichigü ga ípatawa jamáãxüçax ga wüxi ga carneruxacü na jemagümaã namaxcuãxüçax ga naãxpatagü. Rü nhanagürü nüxü:

“Nhama i chütaxügu rü tá Tupana núma Ejituanewa nanamu i wüxi i norü orearü ngerüü i dauxüçüãx rü tá nanadai ja jima nüxira bucü ja

Eqüituanecũãxgü nane i wüxichigü ja İpatawa. Notürü ngëxguma jima nagümaã penamaxcuxgu i perü İãxpata, rü täüxütáma pechiũgu naxücu”,

nhanagürü. Rü jemaãcü ga Muísé rü Tupanaga naxĩnü jerü nüxü najaxõ. Rü jemacax ga jema orearü ngeruũ ga dauxücüãx rü taxuũma ga Judéugünexũ nimax. Rü jema na jaxõõxüçax nixĩ ga İnaxüxüũ ga Ejituarü naãnewa, rü tama naxçax namuũxü na guma Ejituanearü ãëxgacü tá namaã nanuxũ. Rü taguma nüxü narixõ ga Tupanawe na naxüxü, jerü Tupana ja ëxüguciarü ngüchaũ naxü. ²⁹Rü jema duũxügü ga Muíséwe rüxixü rü ta najaxõgü. Rü jemacax ga jexguma jema Taxtü ga Dauchiüxüwa nangugügu, rü jema dexá rü nügüna nixĩgachi, rü nipaaneãchi, rü jéma nichõũ. Notürü jexguma jema Ejituanecũãx ga churaragü ga nawe ngëgüxü nawe ichõũgu, rü jexma najiama, jerü wenaxãrü nügüna naxĩ ga jema dexá. ³⁰Rü jexguma guma İãne ga Jericüwa nangugügu ga jema duũxügü, rü taxucürüwama nichocu, jerü guxüwama naxãxtapüx. Notürü Tupanaãxü najaxõgü, rü jemacax Tupanaga naxĩnüë rü 7 ga ngunexũ nüxü İnichõguãchitanücüü, jema Tupana namaã nüxü İxuxürüũ. Notürü jexguma norü 7 ga ngunexüwa nanguxgu, rü nüëchama niwaxgütapüx, rü jemaãcü nichocu. ³¹Notürü jema nge ga Jericücüãx ga Raábe, rü woo chixri imaxü ga noxrix, notürü jexguma jéma nangugügu ga jema taxre ga Judéugü ga bexma ngugütaewa jéma İxü, rü ngĩma

İjixĩ ga nüxü nangüxëëxü. Rü jemacax tama jema togü ga Jericücüãx ga tama Tupanaga İnüëxürüũ İju, jerü Tupanaãxü İjaxõ. ³²Rü nhuxma rü tacü i togü i duũxügüchigaxü tá pemaã chixuxü? Rü changechica na pemaã nüxü chixuxüçax i nachiga ga jema nuxcümamaxügüxü ga ãëxgacügü ga Jideãü rü Baraqui rü Sãsãü rü Jefté rü Dawĩ rü Chamuéü, rü guxüma ga nuxcümamaxügüxü ga Tupanaãrü orearü uruũgü. ³³Rü jema na jaxõgüãxüçax nixĩ ga Tupana nüxü rüngüxëëxü. Rü jemaãcü to ga nachiüãnegüarü ãëxgacügüxü narüporamaëgü, rü meãma norü duũxügümaã inacuaxgü rü aixcuma nanajauxgü ga jema Tupana namaã İxunetaxü. Rü jemacax ga jexguma woo aitanügu jatãxchigüãgu, rü taxuũma namaã naxü ga aigü jerü Tupana nüxna nadau. ³⁴Rü jexguma norü uwanügü üxüxetüwa jawocuxgu, rü taxuũma nüxü naxüpetü rü tama nixae, jerü Tupanaãxü najaxõgü rü nüma rü nüxna nadau. Rü jexguma togü taramaã nadaixchaũgu, rü Tupana nüxü narüngüxëë na taxuũma nüxü üpetüxüçax. Rü jexguma naturaegu rü norü uwanügü nadaixchaũgu, rü Tupana nanaporaexëë. Rü jexguma to ga nachiüãneãrü churaragümaã nügü nadaixgu, rü jema togü ga churaragüxü narüjexeragü. ³⁵Rü najexma ga ngexügü ga juexacüxü, notürü jema naxãcügü rü wenaxãrü İnarüdagü jerü Tupanaãxü najaxõgü. Notürü najexma ga togü ga poraãcü ngüxü ingegüxü jerü norü uwanügü jemaãcü namaã nachõpetü na Tupanaxü İnatãxgüxüçax. Notürü ga nümagü rü tama Tupanaxü İnatãxgü rü

jemaçax najue, jerü naxçax rü narümemae nixi na wena namaxëxü rü najauxgüäxü i ngëma maxü i taguma gúxü. ³⁶Rü najexma ta ga nhuxre ga togu ga jaxögüxü ga duüxügü nüxü cugüexü, rü jaçuaixgüxü, rü curëtimaã janaixgüxü, rü pocupataügu nawocuxü. ³⁷Rü nhuxre ga nümagü rü togu nutamaã ínanamuxüchigü rü jemaäcü nanadai. Rü nhuxre ga nümagü rü togu najawäixjegü rü najue. Rü nhuxre ga nümagü rü togu ngúxü nüxü ningexëëgü na Tupanaxü ínataxgüxüçax. Rü nhuxre ga nümagü rü togu taramaã nanadai. Rü nhuxre ga nümagü rü nu ne nanaxímare rü carneruchaxmüü rü bodechaxmüümaãmare nixäxchiru. Rü taxuüma nüxü najexma, rü nachixeäëgü jerü norü uwanügü rü chixri namaã nachopetü. ³⁸Rü nhama ga naãneçüäx rü nachi naxaie, notürü Tupana rü nüxü nangechaü. Rü nhama ga naãnewa rü norü uwanügüchaxwa nu ne nanaxímare ga taxúema íxápataxüwa. Rü ngürüanegu nipexütanümare jerü nangepatagü. ³⁹Rü guxüma ga jema nuxcümaxügüxü ga duüxügü rü woo norü ôgagu Tupana namaã na taãëxü, notürü taxuüma ga nümagü rü guxüxüma nadau ga jema mexügü ga Tupana namaã ixunetaxü. ⁴⁰Rü jemaäcü namaã nangupetü ga jema duüxügü, jerü ga Tupana rü tagu narüxínü rü tama nanaxwaxe na nüxíra nüxíca jamexëëgüäxü, notürü nanaxwaxe na tamaã wüxigu jamexëëgüäxü. Rü nhuxma i jixema na jaxögüxü, rü jema nuxcümaxügüxü ga duüxügürüü Tupanaärü duüxügü tixigü, jerü Nane ja Ngechuchu rü guxäçaxma naju. Rü wüxi

i ngunexü rü tá taxçax núma naxü na nügüxütawa tüxü nagagüxüçax na ngëma ingëxmagüechaxüçax.

Name nixi i Ngechuchucümagu taxí

12 ¹Rü nhuxma na nüxü icuáxü na nhuxäcü aixcuma Tupanaäxü jaxögüäxü ga guxüma ga jema nuxcümaxügüxü ga duüxügü, rü ngëma rü wüxi i tóru cuaxruü nixi na nhuxäcü Tupana naxwaxexü na naxçax imaxëxü. Rü ngëmacax i nhuxmax, ¡rü ngíxä nüxü tarüxoe i guxüma i ngëma pecadu i tüxü ítüexëëxü rü tüxü naguxchaxëëxü na meã jaxögüxü! ¡Rü ngíxä paxa naxçax tadaugü na meã Tupanacax imaxëxü rü guxüguma aixcuma naxüxü i ngëma tüxü nanaxwaxexü! ²Rü name nixi i tanangugü na nhuxäcü namaxüxü ga Ngechuchu rü nagu taxí i nacüma. Jerü núma nixi ga nuxcüma nagu naxínüxü na nhuxäcü tóru ôgagu tá tüxü namaxëxëxü rü núma nixi i tüxü nangüxëëxü na aixcuma meã jaxögüechaxüçax na ngëmaäcü naxütawa ingügüxüçax. Rü núma rü tama nügü nachuxu na curuchawa ngúxü jangexü, rü tama nagu narüxínü ga jema äne na jangexü, notürü nataëëxüchi jerü nüxü nacuax na jemawena rü tá muxüma i duüxügü najauxgüxü i maxü i taguma gúxü. Rü nhuxma rü Tupanaärü tügüncüwawa narüto na ngëma guxäärü äëxgacü jüxüçax. ³Rü name nixi i penangugü rü nagu perüxínüë na nhuxäcü ga Ngechuchu rü jaxna namaã naxínüxü ga jema ngúxü ga nüxü jangexëëgüxü ga jema duüxügü ga pecaduaxgüxü. Rü núma ga Ngechuchu rü jemaäcü jema

ngúxúmaã jaxna naxínü na pema rü tama nüxü perüçhauxüçax rü tama nüxü perüxoexüçax na nüxü pejaxögüxü. ⁴Rü nhuxma i pema na pejaxögüxü, rü ngúxü peingegü erü pecaduxü perüxoe. Notürü taxúema ga petanüwa rü jemacax Cristurüü juwa tangu. ⁵Rü name nixí i nüxna pecuaxächie i norü ore ja Tupana i namaã pexü jaxucyxëgüxü i nhuxma na naxácügü peixígüxü. Erü ngëma norü ore i ümatüxüwa rü nhanagürü:

“Pa Chaunex, ¡tãú i nüxü cuxoxü i ngëxguma cuxü icharüwexächixëëgu! ¡Rü tãú i cujarümaxächixü i ngëxguma cuxü chaxucyxëgu! ⁶Erü nüma ja Cori ja Tupana rü tüxü inajarüwexächixëë ja jíxema tüxü nangechaüxë. Rü tüxna nanaçuaixca ja jíxema naxácüxü tüxü najaxúxe, na ngëmaãcü tüxü nanguxëëxüçax na nhuxácü nanaxwaxexü na naxçax tamaxüxü”,

nhanagürü. ⁷Rü ngëmacax i pemax, rü name nixí na jaxna namaã pexínüëxü i ngëxguma Tupana pexna naçuaixcagu. Erü ngëxguma ngëmaãcü pemaã jixígu, rü pexü nüxü nacuaxëë na aixcuma naxácügü peixígüxü. Erü guxüma i papa rü inajanawexächixëë i ngëma aixcuma naxácügü ixígüxü. ⁸Notürü ngëxguma chi Tupana tama pexü ijarüwexächixëëgu, ngëma guxüma i naxácügüxü ijanawexächixëëxürüü, rü ngëmawa tá nüxü pecuax na tama naxácügüxüchi peixígüxü, rü ngenatüxü peixígüxü. ⁹Rü wüxichigü i jixema ga jexguma ibuegu, rü tanatügü rü tüxü

taxucyxëgü, rü jixema rü tùmaga taxínüë rü tüxü tangechaügü. Rü ngëmacax i nhuxma rü jexeraãcü tanaxwaxe na naga ixínüëxü ja Tanatü ja dauxügucü na ngëmaãcü najaxuxüçax i maxü i taguma gúxü. ¹⁰Rü tanatügü rü wüxi i paxaächixaxmare tüxü taxucyxëgü na tüma tanaxwaxegüxüãcüma imaxëxüçax. Notürü ja Tupana rü aixcuma tórü mexüçax nixí i tüxü ijanawexächixëëxü na naxrüü ixüünegüxüçax. ¹¹Rü aixcuma tama tataãëgü i ngëxguma Tupana tüxü ijarüwexächixëëgu, erü tüxü nangux. Notürü ngëmawena i ngëxguma naga ixínüëgu rü janguxëëgu i ngëma tamaã nüxü jaxuxü, rü aixcuma tataãëgü.

Naxãcüma na tama Tupanaga ixínüëxü

¹²Rü ngëmacax i nhuxma na ngúxü peingegüxü rü peipaexü na Tupanawe perüxixü, rü name nixí i pegü peporaexëëama na noxrirüütama meã pejaxögüxüçax. ¹³Rü name nixí i naxçax pedaugü na Tupana pexü naxwaxexüãcüma aixcuma meã pemaxëxü, na jíxema nhuxma tama meã jaxögüxe rü meã tajaxögüxüçax. ¹⁴¡Rü naxçax pedax na guxü i duüxügümaã pemecümaxü! Rü ngëxgumarüü ta name nixí i naxçax pedau na Tupanapexewa naxüünexü i perü maxü. Erü jíxema tama Tupanapexewa üünexë rü tãxütama tórü Corixü tadau. ¹⁵¡Rü pegüna pedaugü na taxúema nüxü oxüçax i ngëma ngüxëë i Tupana tüxü nangechaüãcüma tüxna äxü! Erü tama tanaxwaxe na texé petanüwa Cristuchi

aixũ rü ngêmaãcü togüxũ chixexũmaã taxucüxêxũ na Cristuna tixügachixũcax. ¹⁶Rü tama name i texé i petanüwa rü naĩ i ngemaã na itapexũ. Rü tama name na texé túmaãrü ngêmaxũcax Tupanaxũ na oxũ. Rü jemaãcü nanaxü ga guma nuxcümaücü ga Jacúeneẽ ga Echaú. Jerü jexguma nataijagu rü wüxi ga õnacax nüxü naxo ga guxũma ga jema nüxna üxü ga nanatü chi nüxna äxũ. ¹⁷Rü pema nüxü pecuax rü jemawena ga jexguma najauxchaĩãgu ga jema noxri nüxna üxü, rü marü taxucürüwama nanajaxu, jerü marü naeneẽ ga rübumaëcúna tanaxã ga nanatü. Rü nüma ga Echaú rü woo poraãcü naxaxu, notürü marü taxucürüwama nhuxãcü nanajaxu. Rü ngêmwawa nüxü tacuax na nhuxãcü naxãücümaxũ na tórü ngêmaxũcax Tupanaxü ixoxũ. ¹⁸⁻²¹Rü nuxcüma ga tórü oxigü ga Muíséwe rüxixü, rü nüxü naxĩnüẽ ga Tupanaga ga jexguma nüxü jangaicagügu ga guma maxpúne ga Chinaĩgu áẽgane. Rü nüxü nadaugü ga na jajauraxü ga guma maxpúne rü poraãcü naxëãnexü rü poraãcü buanecü ixüxü rü jabajxbexanexü rü jaduruanexũ. Rü poraãcü namuüẽ ga jema duüxügü, jerü nüxü naxĩnüẽ ga wüxi ga corneta ga tagane rü Tupana ga tagaãcü jéma nhacü:

“Ngëxguma chi wüxie i petanüwa daa maxpúnewa üxgu ;rü noxtacüma nutamaã tüxü ípemuxüchiãcüma tüxü peimá! Rü woo wüxi i pexüna jixĩgu ;rü ngëxgumarüü ta ípenamuxüchiãcüma pejamá!” nhanagürü. Rü jexguma jadexagu ga Tupana, rü poraãcü namuüẽ ga jema

duüxügü. Rü norü muümaã Tupanaxü nacaaxügü na íjachaxãchixũcax ga namaã na jadexaxü. Rü jema na poraãcü naxãücümaxüchixü ga jema nüxü nadaugüxü, rü jemacax nixĩ ga nümatama ga Muísé ga nhaxü:

“Chorü muümaã chidurux i nhuxmax”, nhaxü. Rü jemaãcü nixĩ ga namaã nangupetüxü ga jema duüxügü ga Muísémaã najauxgüxü ga jema nüxĩraüxü ga Tupanaãrü mugü. Notürü i pemax, Pa Chaueneëgüx, rü tama jemaãcü pexü naxüpetü ga jexguma penajauxgügu ga Tupanaãrü ore i ngexwacaxüxü i Cristuchiga ixixü. ²²Rü nhuxma i pema rü taxuücaxma pemuüẽ, jerü ga Cristu rü taxcax naju na Tupana ja guxüguma maxücüxütawa tüxü nagagüxücax, na guxüguma norü íãne ja dauxügune ja Jerucharéügu áẽganewa ingëxmagüxücax. Rü ngéma tá tangutaquexegü namaã i ngéma muxüchixüma i norü orearü ngeruügü i dauxücüãx na wüxigu namaã Tupanaxü icuaxüügüxücax. ²³Rü nhuxma i pemax, rü marü natanüxügü peixĩgü i guxüma i ngéma togü i duüxügü i Tupanaãrü poperawa ngoxégagüxü. Rü marü naxcax pexĩ ja Tupana ja jima guxãnatáma cacü. Rü marü natanüwaama pexügü i guxüma ga jema duüxügü ga mecümagüxü ga juexü ga Tupana imexëëgüxü. ²⁴Rü marü naxcax pexĩ ja Ngechuchu ga taxcax jucü na tüxü namaxëxëxücax, ngéma Tupanaãrü uneta i ngexwacaxüxü tamaã nüxü ixuxürüü. Rü nagümaã pexü najajauxgü ga perü chixexügü na aixcumã Tupanapexewa

peixüünegüxüçax. Rü guma nagü ga taxçax ibacü rü tama guma nuxcümamaxücü ga Abéugürüü nixi. Jerü guma Abéugü na inabaxüçagu rü naéneëxü napocu ga Tupana. Notürü Cristugü i baxüçagu Tupana tüxü nüxü nangechaü i tórü pecadugü. ²⁵Rü ngëmacax name nixi i pexuäëgü na tama nüxü pexoexüçax ja jima Tupana ja nhuxma tamaã idexacü. Rü dücax jema nuxcümamaxüçü ga tórü oxigü ga Muíséwe rüxixü rü taxucürüwa Tupanachaxwa nibuxmü na tama napocueäxüçax ga jexguma Tupanaxü naxoegu rü tama naga naxinüëgu ga jexguma Muíséwa Tupana jaxucyxëgügu. Rü jema na taxucürüwa Tupanachaxwa jabuxmüxü ga nümagü, rü jexeraäcü tüxü naguxcha i jixema na naxchaxwa ibuxmüxü ega tama naga ixinüëgu i nhuxma na Cristuwa tüxü jaxucyxëgüxü i nüma ja Tupana i dauxüçaxü i nañewa ngëxmacü. ²⁶Rü jexguma Muíséwe naxixgu ga tórü oxigü, rü Tupana rü nagamaã najaduruxanexëë. Notürü i nhuxma rü nhanagürü:

“Wena táxaru çajaduruxanexëë.

Notürü ngëxguma ngëmaäcü chanaxüçgu rü täxütáma nhama i nañexiça chiduruxëë, notürü üaçxü rü woramacurigü rü êxtagü rü tá ta çajaduruxgüxëë”,

nhanagürü. ²⁷Rü jema na:

“Wena táxaru çajaduruxanexëë”, nhaxü, rü ngëmawa nüxü tacuax rü guxüma ga jema naxixü i tama guxüçax ixixü, rü Tupana tá inajanaxoxëë na ngëma guxüçax

ixixüçaxatama na ijaxüçaxüçax. ²⁸Rü ngëma na tórü äëxgacü na jixü ja Tupana, rü guxüçax nixi, rü tagutáma inajarüxo na noxrü ixigüxü. Rü ngëmacax name nixi na Tupanana moxë ixägüxü, rü nüxü ingechaüçüäcüma rü nüxü imuüëäcüma nüxü icuaxüçaxüçaxü, ngëma nüma nanaxwaxexürüü. ²⁹Erü tórü Tupana, rü nhama wüxi ja üxürüü aixcuma inajanaxoxëë i guxüma i tórü chixexü.

Nhuxäcü Tupanaxü tataäëxëë

13 ¹Rü nhuxma rü tama name na nüxü perüçhauexü na wüxichigü pegü pengeçhauçaxü nhama peeneëxü pengeçhauçaxüü. ²Tama name na nüxü ipejarüngümaëxü na meäma penajaxuxü i ngëma duüxüçü i pepatawa ngugüxü. Erü nüxü tacuax rü nümaxü ga jemaäcü naxüçaxü rü nhuxgucü rü tama nüxü nacuaäcüma bexma Tupanaärü orearü ngeruüçü i dauxüçaxü meã najauxçü. ³Rü name nixi i nüxna pecuaxächie i ngëma duüxüçü i pocuexü, nhama pema rü ta naxrüü pepocuexürüü. Rü ngëxgumarüü ta name nixi nüxna pecuaxächie i ngëma duüxüçü i togü ngüxü nüxü ingexëëgüxü, erü ngürüächi tá ta ngëmaäcü pexü nangupetü. ⁴Rü ngëma jatüçü i ämaxü rü name nixi i meã naxmaxmaã namaxë rü tüxü nangeçhauçaxü. Rü ngëxgumarüü ta i ngexüçü, rü name nixi i meã natemaã namaxë rü nüxü nangeçhauçaxü. Erü Tupana rü aixcuma tá nüxna naca rü tá napocue i ngëma duüxüçü i na i ngëmaã rü exna na ja jatümaã ipexü. Rü ngëxgumarüü tá ta tüxü napocue ja

guxãma ja jíxema ngemãxãcúma rü ngeteãcúma tügümaã maxẽmarexe. ⁵Rü tama name na dîeruguama perüxĩnũẽxũ. Rü name nixĩ i namaã petaãẽgü i ngẽma marü pexũ ngẽxmaxũ. Jerü Tupana rü nhanagürü:

“Tagutãma cuxna chixü, rü tagutãma cuxũ íchatã”, nhanagürü. ⁶Rü nhuxma na nüxũ icuáxũ na ngẽmaãcü tamaã inaxãũxũ, rü ngẽmacãx tama taxãne na nhagüxũ:

“Nüma ja Cori nixĩ ja choxũ rüngũxẽẽcü. Rü ngẽmacãx taxuũcãxma chamuũ. Erü taxucürüwama texẽ tacü rü chixexũ chamaã taxü”, nhagüxũ. ⁷Rü name nixĩ i nüxna pecuãxãchie ga jema perü daruũgü ga noxri pemaã icuáxũ rü pemaã nüxũ ixugüxũ ga Tupanaãrü ore. Rü name nixĩ i nagu perüxĩnũẽ ga na nhuxãcü meã namaxẽxũ pepexewa rü nhuxãcü meã jaxögüãcúma najuxẽ. Rü name nixĩ ga nüma jaxögüãxürüũ meã pejaxögü i pemax. ⁸Rü nüma ja Ngechuchu ja Cristu rü guxüguma najanguxẽẽ i ngẽma tamaã nüxũ jaxuxũ. Rü nuxcüma rü najanguxẽẽ ga norü ore, rü nhuxma rü ta najanguxẽẽ. Rü guxügutãma ngẽmaãcü nixĩ. Rü ngẽmacãx tanaxwãxe na aixcuma nüxũ jaxögüxũ. ⁹Rü tama name i pejaxögü i ngẽma ngxẽẽtaegü i tama toma pexũ namaã tangüexẽẽxũ i tama Tupanaãrü ixĩgüxũ. Rü nuxcüma rü nagu taxĩ ga jema mugü ga Muísẽ úmatüxũ ga tüxna nachuxuxũ na tacü ixüxũ rü tacü ingóxũ. Notürü jema mugü rü taguma tüxũ naporaexẽẽ ga na Tupanacãx imaxẽxũ. Rü ngẽmacãx tanaxwãxe na

Tupana ja tüxũ ngechaũcüwama na najaxuxũ i tórü pora na aixcuma naxcãx imaxẽxũcãx. ¹⁰Rü ngẽma duũxũgü i Muísẽarü mugügu íxũ, rü Tupanacãx naxũna nadai na tama napocueãxũcãx naxcãx i norü pecadu. Notürü tama nüxũ najaxögü ja Cristu ga tórü pecaducãx jucü. Rü ngẽmacãx taxucürüwama taxrüũ nanajauxgü i ngẽma ngũxẽẽ i Cristu nüxna uaxũxũ. ¹¹Rü ngẽma duũxũgüarü paigüarü ãẽxgacü, rü tupaucawa nanange ja nagü i naxũnagü na Tupanana naxããxũcãx na tama Tupana napocuexũcãx i ngẽma duũxũgü. Notürü naxünegü i ngẽma naxũnagü, rü ããnepechinüwa najanagugü. ¹²Rü jexgumarüũ ta ga Ngechuchu rü ããnepechinüwa ngúxũ ninge rü naju na nagümaãtama Tupanacãx jaxüünegüxẽẽãxũcãx i duũxũgü. ¹³Rü ngẽmacãx i jixema, rü name nixĩ i nüxna tixĩgachi i ngẽma mugü ga Muísẽ úmatüxũ, rü name nixĩ i Ngechuchucãx taxĩ. Rü woo duũxũgü tüxũ cugüegu, jema Ngechuchuxũ na nacugüexürüũ, rü name nixĩ i naxrüũ jaxna namaã taxĩnũẽ. ¹⁴Erü jixema na jaxögüxũ, rü tãũxütãma nhama i naãne i paxa tá gúxüwa tangẽxmagüecha. Erü dauxüxüxũ i naãnewa tüxũ nangẽxma i tachica. Rü ngẽma tá tangugü na guxügutãma Tupanamaã ingẽxmagüechaxũcãx. ¹⁵Rü ngẽmacãx tanaxwãxe i Ngechuchu ja Cristuarü ngüxẽẽmaã guxüguma Tupanaxũ ticuãxüũgü. Rü ngẽma na taãxmaã nüxũ icuãxüũgüxũ, rü ngẽma nixĩ i ãmare i mexũ na nüxna naxãxũ. ¹⁶Rü tãũ i nüxũ ipejarüngümaẽxũ na togüxũ perüngüxẽẽxũ rü namaã pengauxũ i

perü ngẽmaxũgũ! Erü ngẽma nixĩ i
 ãmare i Tupanana pexãxũ i aixcuma
 namaã nataãẽxũ. ¹⁷¡Rü naga pexĩnũẽ i
 ngẽma perü daruũgũ i pemaã icuãxũ, rü
 penaxũx i ngẽma pemaã nüxũ jaxuxũ!
 Erü nümagũ rü Tupanapexewa pexna
 nadaugũ na meã pemaxẽxũçax erü nüxũ
 nacuxgũ na Tupana tá nüxna çaxũ i
 nachiga na nhuxãcü pexna nadaugũxũ.
 Rü name nixĩ i meã namaã pemaxẽ i
 ngẽma perü daruũgũ na wüxi i taãẽ na
 jiĩxũçax i ngẽma norü puracü rü tama
 wüxi i norü guxchaxũ na jiĩxũçax. Erü
 ngẽxguma chi wüxi i norü guxchaxũ
 jixĩgu i ngẽma norü puracü na pexna
 nadauxũ, rü pema rü chi taxuũma i
 mexũ nawa pejaxu i ngẽma norü
 puracü. ¹⁸Rü tanaxwaxe na toxçax
 pejumuxẽgũxũ. Erü toõewa nüxũ tacuax
 na aixcuma meã tajanguxẽẽxũ i ngẽma
 puracü i Tupana toxna ãxũ rü
 tanaxwaxe na guxũguma ngẽmaãcü
 tanaxũxũ. ¹⁹Rü ngẽma guxũãrũ jexera
 pexna naxçax chaçaxũ nixĩ na
 pejumuxẽgũxũ na Tupana paxa pexçax
 choxũ taeguxẽẽxũçax.

**Jema duũxũgũxũ narümoxẽ rü
 naxçax ínaca na Tupana nüxũ
 rüngũxẽẽxũ**

²⁰⁻²¹Rü nhuxma chanaxwaxe i
 poraãcü pexũ narüngũxẽẽ ja Tupana
 ja tórü taãẽxẽeruũ rü tórü
 ngüxmüẽxẽeruũ ixĩcü. Rü nüma nixĩ
 ga juwa ínadaçẽẽãxũ ga tórü Cori ja

Ngechuchu ja Cristu ja guxũma i
 jaxõgũxũãrũ daruũ ja guxããrũ jexera
 ixĩcü. Rü nhuxma na curuchagu
 taxçax nabaãxũ ga guma nagü ga tüxũ
 nüxũ cuaxẽecü na nhuxãcü guxũguma
 tüxũ nangechaũxũ ja Tupana, rü
 chanaxwaxe na nüma ja Tupana pexũ
 jamexẽẽgũxũ rü pexũ nangũxẽẽxũ na
 aixcuma guxũma i perü maxũwa
 pemexũçax. Rü ngẽxgumarũũ ta
 chanaxwaxe na Ngechuchu ja
 Cristuwa tüxũ nangũxẽẽxũçax ja
 Tupana na nüma nanaxwaxexũãcũma
 ixĩgũxũçax. Rü nhuxma tanaxwaxe i
 guxũguma jima Cristuxũ ticuaxũũgũ.
 Rü ngẽmaãcü jiĩxũ. ²²Pa Chaueneẽgũx,
 pexũ chaçaxũ na jaxna namaã
 pexĩnũẽxũ i nhaã noxretama i ore i
 pexũ namaã chataãẽxẽẽxũ rü pexũ
 namaã chaxucuxẽxũ. ²³Rü chanaxwaxe
 na nüxũ pecuãxũ rü taeneẽ ja Timúteu
 rü marü ínanguxuchi ga na napocuxũ.
 Rü ngẽxguma paxa nuã chauxũtawa
 nanguxgu, rü tá ngẽma petanũwa
 chanaga i ngẽxguma pexũ
 íchajadaçgu. ²⁴¡Rü nüxũ perümoxẽgũ i
 guxũma i ngẽma perü daruũgũ i
 pemaã icuãxũ! ¡Rü ngẽxgumarũũ ta
 nüxũ perümoxẽgũ i guxũma i togü i
 taeneẽgũ i jaxõgũxũ! Rü taeneẽgũ i
 Itáriaanewa ngẽxmagũxũ rü ta pexũ
 narümoxẽgũ. ²⁵¡Rü Tupana poraãcü
 pexũ rüngũxẽẽx i guxãma i pemax! Rü
 ngẽmaãcü jiĩxũ.

Rü nuãma pexna.